

# Ya'nan Israiro copirnoros'a napopiso'

## Tapi copirno mashotaton parisitërinso'

**1** <sup>1</sup>Tapi copirno mashotërin. Napo-huachina të'narin ni'ton, noyá a'motopi. Inapotopirinahuë tëranta', co nanitërinhuë' huënocatacaso'. <sup>2</sup>Napoaton a'nara catahuacaso marë' hua'an acorinsoari itapon: "A'nara nanon nocomatënquën nëhuëtiinquënso marë' yonítiinënso ya'huërin. Napora-huaton cahuainquënso marë' quëmarë chachin huë'ëin," itërin.

<sup>3</sup>Napotohuachina a'nara nanon noyápiroyanchin nininso' ya'ipi Israiro no'paquë yonípi. Yonipachinara, Sonin ninano itopiquë a'nara quënanpi. Inaso' sanapi, Apisaca itopi. Ina quënanatona Copirnoquë quëpapi. <sup>4</sup>Ina sanapiso' noyápiroyanchin. Inari copirno a'paiaton nocomarárin. Inaso napoaponahuë', co onporonta copirnoros'a tēcarichininhuë'.

## Atoniasë, copirno yaya'coninso'

<sup>5</sup>Naporo tahuëri'sa copirno hui'nin Atoniasë itopisoso', pa'pin yaya'huërë-taton: "Ca copirno nisarahuë," tēnin. (Inaso', Aquita itopiso' hua'huin.) Ina pochin yonquiaton na'amiachin aluëta-caiso toronano'sa pa'anin. Cahuarioquë pa'pisopita sontaros'santa ya'huëtërin. A'pairápaíso marënta', a'natërápo shonca sontaros'sa ina marë' acorin. <sup>6</sup>Inaso hua'huatapon quëran huarë' co pa'pini pënëninhuë' ni'ton, co noyahuë'

cancantërin. Ma'sona tëranta nisa-huachina, co onporo tëranta pa'pini: "Ma'marëta ina pochin nisaran," co itërinhuë'. Apësaronco piquëran inaso' hua'huatërin. Naporahuaton inanta', noyapin noyapin ni'tërin. <sup>7</sup>A'na tahuëri inaso', Coapo itapon: "Catahuaco canta', copirno ya'coin," itërin. Itohuachina: "Noyapa', catahuainquën nipachin," itërin inarinta'. Apiataro corto hua'anta ina chachin natanpachina, inarinta a'panirin. <sup>8</sup>Satoco corto hua'aniso napoaponahuë', co ina catahuarinhuë'. Coiata hui'nin Pinaia itopiso', Natan pënëntona'pi, inapitarinta co ina catahuapihuë'. Tapi amiconën Simii itopisonta', co Atoniasë catahuarinhuë'. Copirno a'paipisopita sontaros'santa', co ina catahuapihuë'.

<sup>9</sup>A'na tahuëri Atoniasëso', Soiriti natëtë pirayan pita ninin. (Inaso natëtë', Noquiri itopiquë huinan ya'huërinso ya'cari ya'huërin.) Ina pitaquë capa-caiso marë' ohuicaro'sa', tororo'sa', toroa'huaro'sa amoshin nipisopita, inapita atëpatërin. Inapoaton ya'ipi pochin iinpita përarin. Ya'ipi Cota huënton sacatoro'sa copirno marë' sacatopisonta', përarin. Coshatasoi sha'huirin: "Ya'ipi israiro'sa copirnonën ca ya'coanahuë," itërin. <sup>10</sup>Napoapona-huë', Natan pënëntona'piso co përarinhuë'. Pa'pin a'paipisopita sontaros'sa', Pinaia, iya'huain Saromon, inapitanta co përarinhuë'.

<sup>11</sup>Natanso naporapiso nicaton, Saromon a'shin nontapon pa'nin:

—Atoniasë pita nisarin. Inaquë ya'ipi përarinsopita natantonënguë naporin: “Israiro'sa copirnonën ca ya'coanahuë,” ténin. Copirnosó', co manta nitotopirinhüë' napoarin. <sup>12</sup>Napoaton apira carinquën sha'huichinquën ma'sona noya nicamasó'. Inapohuatan co tēpaponënhüë'. Saromonta co tēpaponahuë'. <sup>13</sup>Paaton copirno nontoonquë': “Quëmasó' sinioro copirno chiníquën nanantëran. Nani iráca sha'huitëranco: ‘Yoscoarë' hui'nahuë Saromon itërahuëso' ya'huërëtaponco,’ itëranco. Napoapona-hüë', nani Atoniasë ya'conaton hua'a-nëntacaso caniaritarin huachi,” itëquë'. <sup>14</sup>Napotasën chachin canta ya'conato, ina chachin sha'huitarahuë, itërin.

<sup>15</sup>Napotohuachina Pitisapiso' pa'sahuaton, patoananënguë copirno ni'conin. Inaso' noyá mashoya ni'ton, Apisacari a'pairárin ni'conin. <sup>16</sup>Naporo' isonin quëran no'paquë huarë' monshorahuaton, copirno mosharin. Inapoaso' copirnorí itapon:

—¿Ma'ta nohuantëran? itërin.

<sup>17</sup>—Quëmasó' sinioro copirno chiníquën nanantëran. Nani iráca sha'huitëranco: “Yoscoarë' hua'huan Saromon itërëso' ya'huërëtaponco,” itëranco. <sup>18</sup>Napoaponahuë', nani Atoniasë ya'conaton hua'anëntacaso caniaritarin huachi. Naporinso quëmaso sinioro copirno, co nitochátërranhuë'. <sup>19</sup>Tororo'sa', toroa'huaro'sa inapita atëpatërin. Na'a ohuicaro'santa atëpatahuaton, pita nisarin. Hui'nanpita ya'ipiya pochin përarin. Apiataro, Coapo, inapitanta përarin. Saromoánchin co përarinhüë'. <sup>20</sup>Inaso napopirinhüë', ya'ipiyacoi ninárainquën insosona quëma ya'huërënamën copirno acocaso'. <sup>21</sup>Co'so' ina pochin Saromon

acoyátërasënquënhüë', ma'sha onpohuatan, Atoniasë quiyaso' tēpaponcoi.

<sup>22-23</sup>Nontaso chachin Natan pënëntona'pinta', copirno pëiquë canquirin. Canquirinso a'nari sha'huitohuachina: “Ya'cointa'in,” ténin. Copirno notënanquë nipachina, inaso noya nicaton isonin. Isonin quëran no'paquë huarë' monshomarin. Naporo' Pitisapiso' pipirin. <sup>24</sup>Natani copirno itapon:

—¿Quëma chachin sinioro copirno camaitëran ni'ton, Atoniasë quëma ya'huërënamën hua'anëntarin huachi? <sup>25</sup>Ipora tahuëri chachin inaso pita nicaton, na'a ohuicaro'sa', tororo'sa', toroa'huaro'sa', inapita atëpatërin. Inapora huaton ya'ipiya pochin hui'nanpita përarin. Sontaro capitano'santa përasahuaton, Apiataro corto hua'aonta përarin. Inaquë capatona', o'otona', chiníquën noncaroapi: “¿Atoniasë copirno, hua'qui tahuëri hua'anëncinpoa'!” tosapi. <sup>26</sup>Napoaponahuë', co caso sha'huitërincohuë'. Satoco corto hua'an, Pinaia, inapitanta co sha'huitërinhuë'. Co Saromon tëranta sha'huitërinhuë'. <sup>27</sup>Insosona quëma ya'huërënamën hua'anëntacaso co sha'huitaponcorahuë' acoran ni'ton, ¿ina pochin nisamarai ti? itërin.

#### Saromon copirno ya'conacaso', Tapi camaitërinso'

<sup>28</sup>Natani napotërinso' natanahuaton, Tapiso', Pitisapi apërátaantarín. Huë'sahuaton inaso', copirno notënanquë huanirin. <sup>29-30</sup>Naporo' copirnorí itapon:

—Siniorosó', nisha nisha ma'sha onporahuësopita quëran nicha'ërinco. Ina ni'sárinco ni'ton, Yosë chinotërehuaso yonquiato iráca Yoscoarë' itëranquën. Napo nontëranquënso chachin, ipora tahuëri nisarahuë. Hua'huan copirno ya'conaton, hua'anëntërahuëso

shiranëhuëquë huënsapon huachi, itërin. <sup>31</sup>Napotohuachina Pitisapiso', copirno noya nicaton isonin. Isonin quëran no'paquë huarë' monshomarin. Napotahuaton chiníquën nonin:

—¡Nanpimiataton sinioro copirno hua'anëntocoi! itërin.

<sup>32-33</sup>Ina quëran Tapiso' piyapinënpita camairin Satoco corto hua'an përacaiso'. Pinaia, Natan pënëntona'pi, inapitanta amatërin. Huë'pachinara itapon:

—Catahuainacoso marë' hua'ano'sa acorahuëso quëparahuatoma', hui'nahuë Saromon itërahuëso moranëhuëquë a'mitoco'. Inapotahuatoma', Quiyon huinanquë quëpaco'. <sup>34</sup>Inaquë Satoco, Natan, inapitari tomaquë opomototahuatona', israiro'sa copirnonën nicacaso' marë' aco'ina'. Nani acohuachina', naní quëran chiníquën noina': “¡Saromon copirno hua'qui tahuëri nanpiton, hua'anëchinpoa!” china'. <sup>35</sup>Ina quëran ca'tanatoma', hua'anëntërahuëso' shiranëhuëquë ahuënsëico'. Nani ina huayonahuë ca ya'huërenamëhuë ya'ipi israiro'sa hua'anëntacaso marë', itërin.

<sup>36</sup>Naporo' Pinaiari copirno itapon:

—¡Noyapa! Camaitëranso chachin mini nisarai. Ipora camaitëranso', Yosë nohuantërinso chachin niin. <sup>37</sup>Naporahuaton quëma catahuarinquënso pochachin Saromonta Siniorori catahuain. Ina nohuanton quëma hua'anëntëran quëran noya noya inaso hua'anëchin, itërin.

<sup>38</sup>Ina quëran inapitaso', quiritoro'sa', piritoro'sa', inapitarë chachin Quiyon huinanquë pa'pi. Copirno moranëquë Saronon a'mitëahuatona pa'pi. <sup>39</sup>Co'huara inaquë pa'shâtëraponaraihuë', Satoco corto hua'anso', Yosë caposonën ya'huërinquë pa'nin. Ina quëran pomonquë Yosë marë' toma tapapiso

masahuaton pa'nin. Canconpachina, inaquë Saromon opomototahuaton copirno nicacaso marë' acorin. Ina piquëran a'nari carniro pomon pihuirin. Naporo' ya'ipi ca'tanpisopitari chiníquën nonatona': “¡Saromon copirno hua'qui tahuëri nanpiton, hua'anëchinpoa!” topi. <sup>40</sup>Naporahuatona Quirosarinquë imaquipi. Capa cancantatona piri-nano'sa pihuiari. Inapoapona pochin chiníquën noncaropi ni'ton, no'pa' nacontochináchin niriapi.

<sup>41</sup>Atoniasëso', ya'ipi përarinsopitarë chachin pë'inipi. Naporo' a'napita israiro'sa noncaropiso' natanpi. Coaponta carniro pomon pihuiariso' natanahuaton tapon:

—Ninanoquë chiníquën noncarorapi. ¿Ma'ta ipora onpocal? tënin. <sup>42</sup>Napoaso chachin Apiataro corto hua'an hui'nin Conatan itopisoso' canquirin. Canquihuachina Atoniasëri itapon:

—Huëquë'. Quëmaso' chiníquën nanantëran. Noya nanan ipora quëshiarancoi, itërin.

<sup>43</sup>—Co'chi paya. Copirnonënpoa ya'huëretacaso marë' nani Saromon acorin. <sup>44-45</sup>Satoco, Natan, Pinaia, inapita copirnorori camairin: “Quiritoro'sa', piritoro'sa', inapitarë'quëma chachin Saromon ca'tanatoma', ya'huërenamëhuë ina acoco'. Ina marë' moranëhuëquë a'mitëco'. Naporahuaton Satoco corto hua'an, Natan pënëntona'pi, inapitari copirno nicacaso marë' Quiyonquë aco'ina',” tënin. Ina pochin nicatona', capa cancantërenachin huënantarapi. Inahua mini noncarorapiso natanama nisapaso'. <sup>46-48</sup>Inapoaton Saromon, hua'anëntacaso shiranëquë huënsërin. Catahuacaso marë' copirno Tapiri acorinsopitanta paaparahuatona': “Ma noya copirnonëhuëi nicacaso marë' ya'conan. Yosë chachin catahuainquën tata quëran panca

pancana hua'anëntamaso!," itopi. Copirno Tapi chachionta pè'saranénquë mónsho tahuaton, iso pochin Yosë chinotërin: "Ma noyanquëncha quëmaso! Siniro ninan paya. Quëmaso Yosënuquën, isirairo'sacoi chinotërainquën. Quëma nohuanton a'nara hui'nahuë camaitacaso marë! ya'conin ni'nahuë," ténin, itërin Conatani.

<sup>49</sup>Ina natanahuatona!, Atoniasëri përarinsopitaso!, pa'yanpi. Napoatona a'naroáchin yanquëpi. <sup>50</sup>Atoniasënta Saromon tē'huataton, Yosë caposonën ya'huërinso në'mëtë pëiquë cha'ëcaso marë! pa'nin. Inaquë pa'sahuaton artaro pomonënpitaquë matonin<sup>a</sup>.

<sup>51</sup>Naporinso nicaton, a'nari Saromon sha'huitapon pa'nin:

—Siniro copirno. Atoniasë tē'huatërinquën. Napoaton artaro pomonënpitaquë matërin. Nanan a'patatënuquën naporin: "Ama ipora tēpa'incoso marëhuë!, 'Yoscoarë!', ta'ton sha'huichinco," ténin, itërin. <sup>52</sup>Napotohuachina Saromoni itapon:

—Noya nipachinso!, co manta onpotarahuë!. Napoaponahuë!, co noyahuë! nininso! nitotohuato, chiminapon, ténin. <sup>53</sup>Napotahuaton caraya hua'ano'sa artaro quëran chi'huincacaiso marë! camairin.

Ina quëran Atoniasëso!, copirno pëinënuquë pa'nin. Inaquë nipachina, copirno Saromon notënanquë mónsho tahuaton mosharin. "Natëaranquën," ta'ton naporin. Ina quëran copirnorin ya'huërinquë pacacaso camairin.

### Yachiminatón Tapi camaitërisopita

**2** <sup>1-2</sup>Tapiso! nani yachiminin nintanin. Napoaton hui'nin Saromon nontaton itapon: "Piyapico ni'to canta!

co hua'quiya quëranhuë! chiminarahuë huachi. Quëmaso nipirinuë!, quëmapi chachin huaniton, chiniquën cancantëquë!. <sup>3</sup>Nani Yosë camairinpoa!, a'chintërinpoa ina nohuantërinso nicacaso!. Ya'ipi ina camaitërinso natëquë!. Ya'ipi Moisësë ninshitërinpoaso natëquë!. Ina mini Yosë pëneninpoa!. Ina pochin nipatan, nani ma'sha ninanquë noya pipitarinquën. Intohuasona pa'pataonta!, noya pa'saran. <sup>4</sup>Hui'nanpita, shiparinpita, inapitanta inasáchin natëcaiso ya'huërin. Inapohuatama!, carë anoyatërinso chachin, quëmopinënporáchin isirairo'sa copirnonëna nicapona!.

<sup>5</sup>Coapo naporinso!, ama naniantëquësohuë!. Inaso!, cato sontaro hua'ano'sa tēparin. Niro hui'nin Apiniro itopiso'ton tēparahuaton, Itëra hui'nin Amasa itopisonta tēparin. Inapitariso quiraquë ahuëtatona tēpatopirinahuë!, Coaporiso!, ina i'huëretërin. Napoaponahuë!, co quira tahuëri napotërinhuë!. Topinan tahuëri napotërinso marë! na'inin. Quëmari iporasos!, no'tëquën ana'intacaso ya'huërin. <sup>6</sup>Napoaton yonquínahuan ma'sha niquë!. Inaporinso marë! ama noya chiminchinsohuë!.

<sup>7</sup>Carataquë ya'huërinso Parisirai hui'ninpitaso nipirinuë!, nosoroaton catahuahuë!. Quëma coshatëranso misaquë chachin inahuanta coshachina!. Iráca iya mashoco Apësaron ya'huëretatonco no'huirinco ni'ton, ta'ananpirahuë. Naporo! inahuaso!, nosoroatonaco pa'poyarinaco. Napoaton nosoroquë!.

<sup>8</sup>Isonta!, sha'huichinquën yonquiquë!: Cohuira hui'nin Simii itopiso!, iporahuanta ya'huëarin. Inaso!, Mincamin huënton

<sup>a</sup>1.50 *Artaroquë oshanëno marë! ma'sha ahuiquitohuatëra*: Yosë oshanëno inquitërinpo!. Ina pochachin a'na piyapi artaro pomonënpitaquë matohuachina, tēhuërinso pitari co na'intarinhuë!.

quëmapi. Paorinquë ya'huërin. Iráca ta'ato Maanainquë paasoco, pa'pi chiní-quën no'huirinco. Inaso niponahuë!, noya huénantahuatora, Cortaniil'pa' nacapirinco. Naporo!: 'Yoscoarë!' co carinquën tēparan-quënhuë!', itērahuë. <sup>9</sup>Ipora quëmariso' ama huachi nicha'ëquësohuë!. Yonquí-nahuanquën ni'ton, ma'sona onpotacaso' nitotaran. Inaporinso marë' ama noya chiminchinsohuë anta!," itërin.

### Tapi chiminso'

<sup>10</sup>Ina piquëran Tapi chiminin. Chimin-pachina, Quirosarinquë pa'pitopi. Inaso ninano', sha'huitëranquëmaso chachin: "Tapi ninanonën," itopi. <sup>11</sup>Catapini shonca pi'ipi isairro'sa copirnonën ya'conin. Canchisë pi'i Ipronquë hua'anëntërin. Cara shonca cara pi'i, Quirosarinquë hua'anëntërin. <sup>12</sup>Ina quëran Saronon copirno, pa'pin ya'huërëtatón, isairro'sa hua'anëntërin. Inaso' hua'anëntohuachina, chini chiníquën nanantaton, ya'ipi isairro'sa noya camairin.

### Saromon Iquipito copirno hui'nin maninso'

**3** <sup>1</sup>Saromon copirno Iquipito copirnorë!, noya nini'tona ya'huëcaiso marë' anoyatopi. Anoyatopiso yonquicaiso marë' Saromonso', Iquipito copirno hui'nin manin. Masahuaton, iracaya Quirosarin itopiquë ichiya'huëcaso marë' quëparin. Sacatoro'-sari, pëinën, Yosë pëinën, ninano paira, inapita tēnicai huarë' inaquë ichiya'huërin. <sup>2</sup>Naporo tahuëri'sa Yosë pëinën co nishá-tërapihuë!. Napoaton isairro'saso Sinioro chinotacaso marë' ma'sha yatëpahuachinara, inahuara nohuanton artaro acopiquë tēpatona chinotopi.

### Yonquínhuan nicacaso marë' Saromoni Yosë nataninso'

<sup>3</sup>Saromonso' Sinioro nosororin. Napo-rahuaton pa'pinco' pënëntërinso'pita

acorinso', natërin. Napoaponahuë!, inahuara nohuanton artaro acopiquë ma'sharo'sa tēpatón, Sinioro chinotërin. Yonarin pochin nininsonta a'pëaton chinotërin. <sup>4</sup>Capaon ninanoquë huarënta pa'sahuaton, Yosë chinotacaso marë' ma'sha tēparin. Inaquë ya'huërinso artaro na'con na'con yamotopi ni'ton, inaquë huarë' pa'nin Yosë chinotapon. A'na tahuëri ina marë' huaranca ma'sha atēpatërin. Inapotatón oshanën marë' corto hua'ano'sari noyá ahuiquitopi.

<sup>5</sup>Naporo tashi chachin Siniorori huë'ënhuë ya'notahuaton itapon: "Ma'sona nohuantëranso' natanco acochinquën," itërin. <sup>6-7</sup>Natanahuaton inariso!: "Tatacoso' quëma piyapinën. Inaso', no'tëquënáchin imamiatërinquën. Noyasáchin nicatón, co manta ihuatërin-huë!. Ina marë' quëmariso' noya nicatón catahuaran. Ina nosoroaton isairro'sa hua'anënta'huaso marë' acoranco canta!. Quëma nohuanton hui'napico niporahuë!, ina ya'huërënamën hua'a-nënta'huaso marë' acoranco. Co manta camaita'huaso nitotopirahuë!, napotë-ranco. <sup>8</sup>Napoaponahuë!, piyapinënpita huayonanso hua'anëna ya'conahuë. Inahuaso notohuaro' ni'tona!, panca nacion ocoipi. Onposona ya'huëpiso', co pichichináchinhuë!. <sup>9</sup>Ina pochin nacionso', co insonta nanitërinhuë! inaora noya hua'anëntacaso!. ¡Quëmari anitotohuatan tēhuënhinso', noya camaitapon! Napoaton yonquínhuan nica'huaso marë' catahuaco. Noya nininso', co noyahuë!, nininso' inapita nitochi. Inapita nitotohuato piyanënpita noya hua'anëntarahuë," itërin.

<sup>10</sup>Ina natanatón, Sinioroso' noya cancantërin. <sup>11</sup>Napoaton itapon: "Yonquínhuan nicatón piyapinënhuë-pita noya hua'anëntacaso natanancoso marë' noya cancantërahuë. Co hua'qui

tahuëri nanpicamaso' natanancohuë'. Co ma'huanamaso', co inimiconënpita tëranta chiminacaiso', natanancohuë'.<sup>12</sup> Napoaton natanancoso', carinquën quëtaranquën. Ca nohuanton a'napita quëran yonqui yonquínahuan nisanan. Iráca quëran huarë' co insonta quëma pochin nininhuë'. A'na tahuërinta ya'huëpirinahuë' co quëma pochin nisapihuë'.<sup>13</sup> Ma'huanacaso', pa'yápiro nicacaso', inapitaso co natanancohuë'. Co natanpirancohuë', inapitanta acotarancuën. Acotomiatarancuën ni'ton, nansipëncuën co insonta isoro'paquë quëma pochin copirno ya'huëaponhuë'.<sup>14</sup> Nohuantërahuësoráchin nicaton, pënëntërahuësopita, camaitërahuësopita, inapita natëquë'. Tataco natërinco pochin nipatan, hua'qui tahuëri ni'camaso' catahuanancuën," itërin.

<sup>15</sup> Naporol' Saromonso capayatahuaton, tapon: "Siniorochi huë'ëhuëquë nontërinco paya," tënin. Ina quëran Quirosarinquë canconpachina, Siniororë anoyatopiso caposonën ya'huërinquë ya'conconin. Inaquë ya'conaton oshanën marë' ma'sharo'sa tëparin. Tëparahuaton ya'ipi ahuiquitërin. Nanan anoyatërinso marënta', ma'sharo'sa tëparin. Inapotaton ya'ipi catahuacaiso marë' hua'ano'sa acorinsopita, ichicoshatërin.

### Saromon yonquínahuan coisë nininso'

<sup>16-17</sup> Ina piquëran cato monshihuantë sanapi'sari copirno paapapi. Ina notënanquë nipachinara, a'nari itapon:

—¡Ma'cha sinioro copirno napotaranquën paya! Caso iso caisharo'co, ina pëiquëráchin ya'huërai. Inanta pëiquë ya'huëaso', ca'ton huairahuë. <sup>18</sup> Cara tahuëritapasoco inanta', huaiantarín. Ina pëiquëso', catocóichin ya'huërai. <sup>19-20</sup> A'na tashiso napoaponahuë', isoso

hua'huin ya'quëtatón tëparin. Yono tashi inaso', huë'ësoco huënsëintarin. Hua'huahuë matatonco chimipia'hua acotërinco. <sup>21</sup> Tashiramiachin capayatahuato, hua'huahuë asho'shoca'huaso marë' mapirahuë', nani chiminin. Napoaponahuë', noya ni'patora, inaso co caquënhuë' nininso', nohuitërahuë, itërin. <sup>22</sup> Inaso napopirinahuë', a'nariso itapon:

—¡Co naporinhuë'! ¡Hua'huan mini chimipia'huaso'! Ya'huëre' nansipia'huaso' caquën, itërin.

—Chimipia'huaso quëmáquën. Nansipia'huaso' caquën, itërin ya'nan noninsoari. Ninapotatona', copirno ni'tonëncuë nino'huirápi.

<sup>23-25</sup> Naporápachinara, copirnoson yonquirin: "Ya'nan noninsoso': 'Hua'huahuëso nansipiarín. Chimipia'hua a'nanquënsó',' tënin. Ya'huëre' a'nanta': 'Co naporinhuë'. Nansipia'huaso' caquën. Chimipia'hua inanquën,' tënin." Ina pochin yonquiaton, piyapinënpita camairin:

—¡A'nara sahuëni quëshico! tënin. Napohuachina, quëpatopi. Ina quëran camaitaantarín:

—Nansipia'hua nisahuaso', huancánachin nichatoco'. Inapotatoma a'natëran a'nara quëtoco'. A'nanta', a'natëran quëtoco', tënin. <sup>26</sup> Napoaponahuë', hua'huasha a'shín cháchinso co napion cancantërin. Inapoaton, hua'huin marë' copirno itapon:

—Ama sinioro copirno nansipia'huaya tëpaquësohuë'. Iso cai quëtëquë aso'soin, itërin. A'nariso napoaponahuë', itapon:

—¡Nichachina! Co quëmari tëranta macamaso ya'huërinhuë', itërin.

<sup>27</sup> Naporol' copirnoson, camaitaton tapon: —Ama tëpacosohuë'. Nansipia'hua masahuatoma', paso' sanapi quëtoco'. Ina a'shín cháchinso ni'ton, quëtoco', itërin piyapinënpita.

<sup>28</sup>Naporinso ya'ipi israiro'sa natan-topi. Ina natantatona!, pa'yanpi huachi: “Tèhuenchachin Yosèri catahuarin. Napoaton yonquínahuan pochin no'tè-quèn sha'huirin,” topi.

**Tiro copirno Iran itopisorè!,  
Saromon anoyatèrinso!**

**5** <sup>1</sup>Tiro copirno Iran itopisoso!, Saromon pa'pincorè! noya nipayapi. Saromoni huachi pa'pin ya'huèrètatón, israiro'sa hua'anèntarinso natantèrin. Ina natantatón, catahuacaso marè! hua'ano'sa acorinsopita a'patèrin. Noya cancantèrinso sha'huitacaiso marè! naporin. <sup>2</sup>Saromonso! sha'huitohuachinara, inapita noya nontèrin. Noya nontatón hua'anèna iso pochin ta'caiso nanan a'patèrin: <sup>3</sup>“Caquèn tataco!, Yosè chinotacaso pèi nicacaso yonquipirinhuè!, inimiconènpitarè niahuèápatona!, co nani-tèrinhuè!. Napoin quèran huachi Siniorori catahuarin inimiconènpita minsèrin. <sup>4</sup>Inapita minsèpirinhuè!, Yosè pèinènsò! co nitèrinhuè!. Iporaso nipirinhuè!, Sinioro nohuanton co huachi niahuèatoiraihuè!, sano ya'huèrai. Co huachi inimicoro'sa ya'huèrinhuè!. Naporahuaton co ma'sha tèranta tè'huata'huaiso ya'huèrinhuè!. <sup>5</sup>Napoaton cari huachi yonquirahuè, Yosè chinotacaso pèi anita'huaso!. Inari chachin iráca tataco nani sha'huitèrin: ‘Ca nohuanto hui'nán quèma ya'huèrè-namèn israiro'sa hua'anèntarin. Inari piyapinènpita camaiapon chinotiinacoso pèi nitiinacoso!’ itèrin. <sup>6</sup>Napoaton catahuaco. Piyapinènpita camaiquè Nipano motopiro'sa quèran nonara ocoichinaco. Ina ocoicaiso marè! piyapinènhuèpitanta!, quèma piyapinènpita catahuapona!. Canpita no'panèmaquè sitono'sa ya'huèpi. Inapitaso! misotopi nontèquè sacatacaiso!. Quiyaso! israiro'sacoi co ina nitotèraihuè!. Napoaponahuè! piyapinènpita sacatèrinso

marèso!, ma'sona nohuantèranso! natanco no'tèquèn pahuèrè'inquèma!” itèrin.

<sup>7</sup>Iran piyapinènpitaso!, pa'sahuatona ina inachachin hua'anèna sha'huitontapi. Natanatón, inaso capa cancantèrin. Capa cancantatón tapon: “¡Ma noyacha Sinioroso paya! Ina nohuanton Tapico hui'nin, yonquínahuan ninin. Ina pochin ni'tón, israiro'sa nóya hua'anèntapon,” tènin. <sup>8-9</sup>Ina tosahuatón Saromon sha'huitacaiso marè! piyapinènpita a'pataantarin: “Naporanso!, nani piyapinènhuèpita sha'huitèrinaco. Natanancoso chachin nonara, pino nara, inapita a'pataranquèn. Piyapinènhuèpitari Nipano motopiro'sa quèran marè'pa! tè'yaitapona!. Inaquè nantènahuatona!, marè quèpatapi. Insèquèsona nohuantèranquè què'camahuachina!, piyapinènpitari i'shiritahuatona quèpataponèn. Ina marè! quèmanta nisha nisha coshoro quètaranco ya'huèrahuèquè piyapinènhuèpita capacaiso marè!” itèrin.

<sup>10</sup>Inapoaton Iranso!, nonara, pino nara, inapita Saromon quètèrin. Onposona nohuantèrinso! quètèrin. <sup>11</sup>Ya'huèrè! Saromoninta!, nani pi'lipiquè Iran copirno coshoro quètèrin: Catapini michon catapini pasa huaranca quiro què'ninso! trico. Tomanta asitona quèran ocoipiso!, catapini huaranca catapini pasa nitro. <sup>12</sup>Inapoaton Siniorori Saromon catahuarin yonquínahuan nicacaso marè!. Sha'huitèrinso chachin acotèrin. Naporahuaton Saromoniso!, Iran copirnorè! noya ninicatona ya'huècaiso marè! anoyatopi.

<sup>13</sup>Naporo tahuèri'sa Saromonso!, israiro'sari catahuacaiso marè!, sontaro'sa chiníquèn nanan quètèrin piyapi'sa huayonacaiso!. Inapoatona!, ya'ipi israiro'sa no'panènaquè cara shonca huaranca quèmapi'sa yontónpi. <sup>14</sup>Inapitaso!, cara huènton acopi. Shonca

huananca shonca huananca acopi. A'na huënton'ton Nipano motopiro'saquë a'na yoqui marë' pa'sapi. Huëantarahuatona', cato yoqui ya'huëpique' ya'huëantapona'. Inapitaso', co pahuëräaponaraihuë' asacatopi. Isopita sacatoro'sa hua'anënaso', Atoniran itopi. <sup>15</sup>Naporahuaton pasa a'naterápo shonca huananca quëmapi'sa', Saromon marë' sacatapi. Ina motopiro'saquë chachin posa shonca huananca ya'pi na'piro'sa', pëcaiso marë' patëtopi. Canchisë shonca huarancanta', pë'pëto camayoro'sa ya'conpi. <sup>16</sup>Camaitoro'santa', cara huananca ya'huëpi. <sup>17</sup>Saromonso' na'pi patëtoro'sa pancara'pisáchin patëta-caiso' camaitërin. Yosë pëinën simintonën marë' inapita nohuanterin. Ina na'piro'saso', na'con na'con pa'topi. <sup>18</sup>Inapoa-tona pëi camayoro'saso', nara pë'shitëpi, na'piro'sa patëtopi, napopi. Yosë pëinën nitacaiso marë' inapita tapapi. Inapita pëi camayoro'saso', Saromon, Iran, inapita piyapinënpita. Quiparo ninanoquë ya'huë-pisopitanta', catahuatopi.

#### Saromon Yosë chinotacaso pëi' anitërinso'

**6** <sup>1</sup>Copirno ya'conin quëran huarë' Saromonso', nani catapini pi'ipitarin. Naporo' Yosë chinotacaso pëi' anitacaso caniaritarin. Pascoa yoqui quëran a'na yoqui niantarinquë caniaritarin. Naporo' israiro'sa Iquipito quëran pipipiso', nani catapini pasa posa shonca pi'ipi nanirin.

<sup>2</sup>Yosë chinotacaso pëi' nipachinara: Cato shonca canchisë mitro naporopitërinso acopi. Pancanatërinsona iscon mitro acopi. Inaparinsoso nipirinhuë', shonca cara mitro miria acopi. <sup>3</sup>Ya'coana parti quëran ishpanamën pochin nininso' ya'huëtërin. Pëi' pancanatërinso' nani chachin iscon mitro naporopitërin. Pancanatërinso' catapini mitro miria

ya'huëtërin. <sup>4</sup>Naporahuaton huintana-ro'santa acotacaiso marë' camaitërin. Hua'nanan quëran nipiquë pa'shintëra'piapi. <sup>5</sup>Corto hua'ano'sa ma'sha tapacaiso marënta', apëitaantarin. Pairaro'sa nanirinquë aipiran quëran, cara pa'cotë ya'huëcaso marë' inapotërin. Cato parti quëran chachin, naporopitërin quëran inapotërin. Oncotënan parti quëraonta acorin. <sup>6</sup>Ya'natomarinso pa'cotëso', cato mitro miria pancanatërin. Huancanachinso', cara mitro ya'huëtërin. Ya'natontarinso nipirinhuë', cara mitro miria ya'huëtërin. Yosë chinotacaso pëi pairanën acohuachinara, co napopináchin tanónën acopihuë'. No'pa quëranso', tano tanónën acopi. Huancana pa'cotë partiso', shimënën miachin acopi. Inapa pa'cotë partiso', shimë shimënën acopi. Ama pa'cotëro'sa huicanëna paira aquëtëran huarë' na'huëcaso marëhuë', ina pochin acopi. <sup>7</sup>Yosë pëinën acohuachinara, na'piro'sa ocoipiquëranchin noyá tapapinan quëpi. Napoaton pëihuachinara co huachi martichoquë sacatopihuë'. Co na'pi patëtopiquë tëranta', co ma'sha hua'naquë tëranta sacatopihuë ni'ton, tanahuantárin. <sup>8</sup>Ya'natomarinso pa'cotë ya'coananën, inchinan parti quëran acotopi. Huancana pa'cotë', inapa pa'cotë', inaquëpita pantacaso marë' tahirantarin nanpënanquë pantapi. <sup>9</sup>Pëina'piro'sa Yosë chinotacaso pëi yaa'canpachinara, huicaro'sa acora'piapi. Ina aipi nontëro'sa chi'nipipi. Huicaro'sa', nontëro'sa', inapitaso nonarasáchin acotopi. <sup>10</sup>Ma'sha tapacaiso marë' pa'cotëro'sa huicanënpitanta', nonara quëran nitopi. Ya'lipiana chachin inapotopi. Inapita pa'cotëro'saso', cato mitro miriasáchin inapara'piapi.

<sup>11</sup>Naporo' Siniorori Saromon itapon: <sup>12</sup>“Iporaso', chinotamacoso pëi nitaranco. Israiro'sanquëma ya'huëramaquë ya'huëca'huaso marë' nitaranco. Ya'ipi



camaitërahuëso natëtonco noya niquë'. Inapohuatan, carinta tataparinco sha'huitërahuëso pochachin nitaranquën. <sup>13</sup>Canpita ya'huëramaso huáncana ya'huëato, catahuaráponquëma'. Co onporonta pataranquëmahuë'. Iso pëiquë nontohuatamaco, natanaranquëma', itërin.

<sup>14</sup>Inapoatona pëina'piro'saso', Yosë chinotacaso pëi tënipi. <sup>15</sup>Nani tënihua-chinara, Saromoni pëina'piro'sa acoana tapacaiso' camairin. Acoana ya'ipi paira nani chachin nonara nontëquë achinpitëra'piacaiso', camairin. Napohuachina inapotopi. I'natacaisoso nipirihuë', pino nontëquë inapotopi.

<sup>16</sup>Yosë chinotacaso pëi acoana, patoana nitopi. Iscon mitro naporopitërinso'. (Pancanatërinsona nápo chachin.) No'pa quëran huarë' huica'pa' icaninso', nonara nontë quëran pairatopi. Noya noya patoana nicacaso marë' inapotopi. <sup>17</sup>Ya'natiirinsoso', panca panca patoana ninin. Inaso', shonca posa mitro naporopitërin. <sup>18</sup>Ya'ipi acoana nontëro'sa achinpitopiquë, noyápiachin nonanpi. Nontëquë chachin patëtahuatona', yancoro'sa, sharo'sa nitopiso', inapita nonanpi. Nonarasáchin ya'norin. Co a'na na'pi tëranta ya'norinhuë'.

<sup>19</sup>Ina quëran Saromonso', noya noya patoana nininso' taparin. Inaquë



Siniororë' anoyatopiso caposonën acocaso marë' taparin. <sup>20</sup>Sha'huëtëran-quëmaso chachin noya noya patoanaso', iscon mitro pancanatahuaton nápo chachin naporopitërin. Inaparinsonta', nápo chachin ya'huëtërin. Patonpiso ya'carinta', a'nara artaro acorin. Nonara nontë quëran anitahuaton, ya'ipi chachin oro quëran pashitopi. <sup>21</sup>Ina quëran chachin ya'ipi pëiana pashitopi. Noya noya patoananta inapotopi. Ina patoanaso', ya'coananën aipi oro quëran catina nipiquë acotopi. <sup>22</sup>Inapotatona', ya'ipi acoana oro quëran pashitopi. Acoana artaro ya'huërintsonta', inanpi quëran chachin pashitopi.

<sup>23</sup>Cato quiropino'santa', anitërin. Oripo nara quëran anitahuaton, noya noya patoana nininquë acorin. A'naya a'naya catapini mitro miria naporopitërinso anitërin. <sup>24-25</sup>A'naya a'naya anpiantëna cato mitro miria pochin ya'huëtërin. Napoaton cato quëranso', catapini mitro miria ya'huëtopi. Inapitaso' inanapapiráchin nipi. Naporahuaton napopináchin ya'nopi. <sup>26</sup>Naporopitopisonta', napopináchin nipi. <sup>27</sup>Inapitaso' noya noya patoanaquë iso pochin acocaiso', Saromon camaitërin: Anpiantëna anquipi quëran acopi. A'naso', ahuënan anpiantën quëran a'natëran paira caririn. A'nanta', inchinan anpiantën quëran a'natëran paira caririn. Ya'huërë' huancanachinso', anpiantëna quëran nicaripi. <sup>28</sup>Inapitanta oro quëran pashitacaiso', camaitërin. Camaitohuachina inapotopi.

<sup>29</sup>Ya'ipi pairatopiquë, acoana quëran, aipiran quëran nontëquë chachin patëtahuatona', quiropino'sa nonanpi. Palmeraro'sa', yancoro'sa', inapitanta nonanpi. <sup>30-32</sup>Acoana i'natopisonta', ya'lipiana chachin oro quëran pashitopi. Noya noya patoanaquënta', inapotopi.

Ina ya'coananënso', catotë huarë' ya'huëtërin. Inapitaso', oripo nontë quëran nitopi. Inapitaquënta patëtahuatona', quiropino'sa', palmeraro'sa', yancoro'sa', inapita nonanpi. Inapota-huatona', oroquë pashitopi anta'. Ina ya'coanaso', a'natërápo cacinën ya'huëtërin. No'pa parti quëran cato ya'huëtërin. Inapa quëranso', cara cacinën ya'huëtërin. <sup>33-34</sup>Tëquën ya'coananën chachinso', catapini cachihuan acorin. Onconan chinpinano'saso', oripo nara quëran nitopi. Onconano'saso', pino nontë quëran nitopi. I'soahuahuachinara, tahuí chararin. <sup>35</sup>Inapitaquënta patëtahuatona', quiropino'sa', palmeraro'sa', yancoro'sa', inapita nonanpi. Inapotahuatona oroquë pashitopi anta'. <sup>36</sup>I'iratënta pairapirin. Cara panshin na'pi patëtopinan quëran acorin. A'na panshina' nonara nontë tanónën nininso' quëran, acotopi.

<sup>37-38</sup>Saromon copirno ya'coninso nani catapini pi'ipitaso', Yosë chinotacaso pëi' simintonën acotapi. Pascoa yoqui quëran, niantarinso' yoquiquë inapitapi. Nani shonca a'na pi'i copirno ya'coninso' nanihuachina, ténirapi huachi. Pascoa yoqui quëran posa yoqui na'huërahuaso', ténirapi. Ya'ipi yonquirinso acocaiso marë' Saromon piyapinënpitaso', canchisë pi'i sacatopi.

#### Yosë caposonën chinotacaso pëiquë quëpapiso'

**8** <sup>1</sup>Yosë chinotacaso pëi' ténipiso piquëran, Saromonso' Quirosarinquë israiro'sa ayontonin. Ansiano'sa nipsisopita a'naya a'naya huëntonënaquë, hua'an ya'conpispopita, a'napitanta hua'ano'sa pochin chiníquën nanantopispopita, inapita ayontonin. Siniororë' anoyatopiso caposonën pa'pincori acorin quëran, Yosë chinotacaso pëiquë

quëpacaiso marë' naporin. <sup>2</sup>Imënamëa'-huaro'sa pita itopiquë niyontonapi. Inaso' pita, pascoa yoqui quëran canchisë yoquitahuaso', na'huëpi.

<sup>3</sup>Ya'ipi Israiro ansiano'sa canqui-huachinara, corto hua'ano'sari Yosë caposonën quëpacaiso marë' naranënpita patorotopiso' mapi. <sup>4</sup>A'napitanta', në'mëtë pëinën so'nanapi. So'nanahuatona inarë chachin quëpapi. Inaquë ohuaracaiso marë' nisha nisha acopisonta', quëpapi. Iráca Yosë camaitërinso chachin nitopi. <sup>5</sup>Naporo' Saromonso', ya'ipi niyontontopitarë chachin Yosë caposonën notënanquë ma'sharo'sa ina marë' tëpapi. Co pichinahuanhuë' ohuicaro'sa', tororo'sa', inapita tëpapi.

<sup>6</sup>Ina quëran corto hua'ano'sari Yosë chinotacaso pëi acoana po'moontapi. Noya noya patoana itopiquë po'morahuatona', quiropino'sa anpiantëna quëran anquipisoanaquë acoonpi. <sup>7</sup>Ina quiropino'saso' anpiantëna quëran anquiápi. Inapoatona Yosë caposonën, naranënpita, inapita ana'itatë pochin nitopi. <sup>8</sup>Napoaponahuë', Yosë caposonën naranënpita patorotopisoso', naporopi acotopi. Ina ni'ton, noya noya patoana i'sohuatohuachinara, noya patoana itopi quëran huarë', pi'pian ya'norinso quënanpi. Inapo acopiso', iso quirica ninshitasoco huarënta inaquëranchin nisarín. <sup>9</sup>Yosë caposonënuëso', cato na'pitëa'huaro'sa ya'huërin. Inapitaquë israiro'sa Siniororë anoyatopiso', ninshitopi. Iquipito quëran pipipona Sinaiquë Moisésëri po'morin.

<sup>10</sup>Yosë chinotacaso pëi quëran corto hua'ano'sa pipipi. Nani pipihuachinara, chitorori mëntatërin. <sup>11</sup>Ina a'pininso nicatona corto hua'ano'saso', co huachi nanitopihuë' acoana sacatacaiso'. Yosë huënaratërinsoari noyá a'pintërin ni'ton, napopi.

### Pëi Yosë marë' acorinso'

<sup>12</sup>Ina quëran Saromonso' Yosë nontaton itapon:

“Quëmaso' Sinioro tashinanquë ya'huëran.

<sup>13</sup>Inaquë ya'huëpiranhuë', carinquë pëi anitëranquë.

Inaquë ya'huëmiatamaso marë' acotëranquë,” itërin.

<sup>14</sup>Itahuaton, israiro'sa huaniran-tapaiso ya'huëré', tahuërétaantarín. Tahuërétahuaton noya ya'huëcaiso marë' sha'huitërin: <sup>15</sup>“¡Ma noyacha Sinioroso paya! Inaso', israiro'sanpoa chinotërehua'. Tata Tapico sha'huitërinso chachin nani acotërinpoa'. Inari iráca sha'huitërin: <sup>16</sup>‘Israiro'sa Iquipito quëran ocoirahuë. Naporo quëran huarë' co a'na ninano tëranta', no'panëmaquë chinotamacoso pëi nitamacoso marë' huayonahuë. Quëmaso napoaponahuë', cari chachin huayonanquë israiro'sa hua'anëntamaso marë', itërin. <sup>17</sup>Tatacoso' mini nohuantopirinhuë' Yosë nënpoa pëinën nitacaso'. <sup>18</sup>Siniorori itërin: ‘Chinotamacoso pëi yanitatonco, noya yonquiran. <sup>19</sup>Napoaponahuë', co quëma nitarancohuë'. Hui'nan ya'huërétarinquë nininso', ina nitarinco huachi,' itërin. <sup>20</sup>Napotërinso chachin, ina nohuanton cari tatahuë ya'huëré-tërahuë. Inapoato ina chinotacaso pëi anitërahuë. <sup>21</sup>Naporahuaton, shima-shonënpoa Iquipito quëran pipipona Siniororë' anoyatopi. Ina caposonën ya'huëcaso marë' a'nara patoana acotërahuë,” itërin.

<sup>22-23</sup>Ina quëran Saromonso', artaro notënanquë pa'nin. Inaquë Sinioro marë' ma'sharo'sa ahuiquitopiso'. Niyontontopisopitanta pinën parti quëran huanirantapi. Naporo' anquirahuaton Yosë nontërin: “Quëmaso' Sinioronquë.

Ya'ipi isairi'o'sacoi chinotërainquën. Co a'na Yosë tëranta isoro'paquë quëma pochin ya'huërinhuë'. Pi'iro'tëquënta co ya'huërinhuë'. Inë'quën tëranta anoyatohuatan, sha'huitëranso chachin ninan. Inso tëranta ya'ipi cancanën quëran natëhuachinquën nosoromiatëran. <sup>24</sup>Ina pochinquën ni'ton, tatahuërë'quën anoyatëran. Anoyataton sha'huitëran: 'Hui'nän ya'huërëtarinquënso', chinotamacoso pëi nitarinco,' itëran. Inaso' natërinquën ni'ton, sha'huitëranso chachin nani nanirin.

<sup>25-26</sup>Naporahuaton, isonta tata Tapico nani sha'huitëran: 'Ca nohuanton quëmä quëran pipisopitaráchin isairi'o'sa hua'anëntapona'. Quëma natërancoso pochachin inapitanta natëhuachinaco, inapoapi,' itëran. Ina pochin sha'huitëran ni'ton, ina inachachin nitëquë'.

<sup>27</sup>Pëi mini nitopiranquënhuë', co quëmaso' inaquë naniaranhuë'. Co pi'iro'tëquë tëranta naniranhue' nichinapon chachin, aquëtë huarë' iso pëi nitëranquënuës'o', co naniponhuë'. <sup>28-29</sup>Ina niponahuë', Sinioro quëmaso Yosënhuëinquën. Canta piyapinënc'o ni'ton, apira nontaranquënso' natanco. Chinotiinënuënso marë' iso pëiquë huë'pachina', tahuëri tashirë chachin ni'sáquë'. Isëquë quëma nininën ya'huëarin ni'ton, nontëranquënso' natanco. <sup>30</sup>Quëmaso inápaquë ya'huëran. Nipirinhue' Insëran tëranta iso pëi notërahuatoi nontohuatëinquën, noya natancoi. Inapoaton catahuacoi. Oshahuanpatointa nontarainquën. Nontohuatëinquën, oshanëhuëi inquitatoncoi nanan anoyatocoi.

<sup>31</sup>Ma'sha nionpotopiso' nisha'huirapihuachina', insosona sha'huirapipiso' artaronën notënanquë pa'sarin. Chinotatënen ma'sha tëparahuatona ahuiquitopiquë pa'sarin. Topinan

quëran napatohuachina': 'Yoscoarë' co naporahuë', tapon. <sup>32</sup>Naporinso natanahuaton, no'tëquën nonsahuachin pa'poyaquë'. Insosona tëhuëhuachin, no'tëquën ana'intëquë'.

<sup>33-34</sup>Tapona a'na tahuëri isairi'o'sa co natëtënenhuë', oshahuanapona'. Napohuachinaso', inimiconënapitari minsërahuatona quiquiaponá'. Inapitaso napoaponahuë', chinotaantarinën. Iso pëinën ya'huërinso parti notërahuatona', nontapënen. Inapotohuachinën, ya'huëran quëran natanaton, oshanëna inquitëquë'. Nanan anoyatahuaton, shimashonëna no'pa' quëtëranquë chachin quënantaquë'.

<sup>35-36</sup>A'na tahuëri isairi'o'sa co natëtënenhuë', oshahuaantapi. Inapopiso marë' quëma nohuanton co huachi o'nan ya'huëarinhuë'. Napohuachina: 'Co noyahuë' ninëhuaso marë' Yosë ana'intarinpoa', ta'tona', chinotaantarinën. Oshanëna a'porahuatona pëinën parti notëtopi quëran nontaantarinën. Inapotohuachinën, ya'huëran quëran natanahuaton, piyapinënpita oshanën inquitëquë'. Nanan anoyatahuaton a'chintëquë onpopinsona imainëns'o'. Naporahuaton quëma nohuanton o'nanta'in. Ama taquiatonaraihuë', no'pa' hua'anëntopiso niya'huërëtopaiso marë'.

<sup>37</sup>Piyapinënpita co natëtënenhuë' oshahuaantahuachina', quëmari ana'intaran. Quëma nohuanton sha'topisopita co manta nitaponahuë'. Pi'i quëranhuë nipon, taquiapon. Sëquë-rërihuë nipon, cha'chorihuë nipon, pë'yapon. Pëtoratërin quëranhuë nipon, chanatapon. A'na tahuëriso inimiconënpitarihuë nipon, ninanonëna tancapitahuatona ahueäpona'. Chiniquën caniohuë nipon ya'conaton, tiquiapon. Inapoatona parisitapona'.

<sup>38</sup>Ina marë' a'naya a'nayahuë nipon, ya'ipi israiro'sahuë nipon: 'Oshahuanëhua ni'ton, Yosë ana'intarinpoa,' taponá'. Inapohuachina' pëinën parti anquirahuatona', nontapënen. Oshanën inquitacaso marë' nontohuachinën, quëmari inquitëquë'. <sup>39</sup>Quëmasáchin a'naya a'nayacoi yonquiraiso', nitotëran. Ina nitotaton a'naya a'nayacoi no'tëquën a'panicoi. Oshahuanpiso marë' aparisitëran ni'ton, nirótëatona nontohuachinën, ina inquitaton nanan anoyatëquë'. <sup>40</sup>Inapotohuatan, shimashonëna no'pa' quëtëranquë ya'huëapona'. Inaquë ya'huëapona pochin noya nicatënen chinotáponën.

<sup>41-43</sup>Nisha piyapiro'santa niponaraihuë', noya nicaton nahuinanso natantapi. Chiníquën nanantëransonta', natantapi. Ina natantatona', áquë ya'huëapona-raihuë' huëcapayarinën. Huë'pachina', pëinën parti notëtahuatona nontaponën. Inapotohuachinën, ya'huëran quëran natanahuaton, nataninënquënso chachin acotëquë'. Ya'ipi isoro'paquë nisha nisha piyapiro'sa ya'huëpi. Inapitanta', nohuitiinënquënso marë' a'paniquë'. Nohuitohuachinën noya nicatënen quiya pochachin chinotarinën huachi. Inapoatona': 'Tëhuëenchachin Saromon Yosë chinotacaso pëi anitërinquë, Siniro ya'huërin. Napoaton inaquë ina nontohuatëra, nataninpoa,' taponá'.

<sup>44-45</sup>Israiro sontaro'sa inimiconënpita ahuëcaiso marë' intohuaso' quëmari a'pahuatan, nontarinën. Intohuaran tëranta iso ninano huayonanso parti notëapi. Chinotiinënquënso marë' pëi anitëranquënso parti notëtahuatona', nontarinën. Napohuachina', ya'huëran quëran natanahuaton, catahuaquë'.

<sup>46</sup>Quiyaso' piyapicoi, ya'ipicoi oshahuancoi. Co quëma natëtëinquinhuë' naporai. Napoaton israiro'sa

tëhuëtatënen oshahuanpachina', quëmariso' chiníquën no'huiton ana'intaran. Inimiconënpitari minsëatona', ya'huëpiso no'pa'pa' quëpaponá'. Aquëhuë nipon, yacariahüë nipon, quëpaponá'. <sup>47</sup>Taponá quëpapiso' no'paquë, chinotatënen: 'Tëhuëenchachin co noyahuë' ninai. Ina nipirinhüë', oshanëhuëi inquitatoncoi catahuacoi,' itapënen. <sup>48-49</sup>Taponá quëpapiso' no'paquë quëmasáchin cancantatënen chinotërinën. Taponá shimashonënpita no'pa' quëtëranso parti, Quirosarin ninano huayonanso parti, iso pëi anitëranquënso parti notëtahuatona', nontarinën. Inapotohuachinën ya'huëran quëran natanahuaton, catahuaquë'. <sup>50</sup>Co noyahuë' nicatona oshahuanpiso', inquitëquë'. Co natantochináchinhüë' cancantopisonta inquitahuaton, catahuaquë'. Quëpapisopitari nosorocaiso marë' catahuaquë'. <sup>51</sup>Israiro'saso', quëma piyapinënpita. Quëmari hua'anëntëran. Shimashonënpita Iquipitoquë aparisitápirinahuë', ocoiran. Hua'na asoquipiso ornoquë pochin parisitápirinahuë', napotëran.

<sup>52</sup>Canta piyapinëncó ni'to, nontaranquënso' natanco. Israiro'santa piyapinënpita. Inapitanta nontarinën ni'ton, natanquë'. ¡Co napion ancantatoí nontohuatëinquinën natancoi! <sup>53</sup>Nisha nisha piyapiro'sa', nisha nisha nacionquë ya'huëpi. Ya'huëpirinahuë', quëmaso huayonancoi. Piyapinën Moisésë itopiso', quëma nohuanton shimashonëhuëipita Iquipito quëran ocoirin. Naporo' ina quëran anitotërancoi hua'anëntërancoiso', itërin.

<sup>54</sup>Ina pochin Saromonso', Yosë nontërin. Artaro notënanquë isonin quëran anquirahuaton nontërin. <sup>55</sup>Ina quëran huanirahuaton, israiro'sa noya ya'huëcaiso marë' sha'huitërin:

<sup>56</sup>“Ma noyacha Sinioroso paya! Sha'huitërinpoaso chachin israiro'sanpoa noya ya'huërehua'. Moisésë quëran anitotërinpoaso chachin, noya catahuarinpoa'. <sup>57-58</sup>Sinioronënpoaso' Yosë ni'ton, catahuainpoa'. Shimashonënpoapita catahuarinso pochachin nichinpoa'. Ama naniantatonpoarahué', natëtochináchin cancantacaso marë' catahuainpoa'. Ma'pitaso ninëhuaquë nohuantërinsoaráchin nicatëhua pënëntërinso' natëahua'. Nohuantërinso'pita, camaitërinso'pita, inapitanta natëahua'. Ya'ipi inapita natëcaiso marë' shimashonënpoapita camairin. <sup>59</sup>Ipora tahuëri Sinioro nontërahuëso', tahuëri tashirë chachin yonquirá'in. No'tëquënáchin catahuainpoaso marë' napo'in. Canpoaso ina piyapinënpita ninëhua ni'ton, nani tahuëri pahuantërinpoasopita aochinpoa'. <sup>60</sup>Inapotohuachinpoa', Sinioronënpoasáchin Yosë nininso', ya'ipi isoro'paquë nitotapi. Nisha nisha piyapiro'sa ya'huëpiso nohuitapi. <sup>61</sup>Napoaton canpitanta Sinioro no'tëquën imaco'. Ina Yosënënpoa chinotërehuaso'. Pënëntërinso'pita, camaitërinso'pita, inapita ipora tahuëri natërehuaso pochachin nisáco'” itërin.

<sup>62-63</sup>Ina piquëran Saromonso', niyontonpisopitarë chachin Sinioro marë' ma'sharo'sa tëpapi. Naporo' Saromonso', cato shonca cato huaranca tororo'sa atëpatërin. Ohuicarosanta pasa cato shonca huaranca atëpatërin. Nanan anoyatërinso marë' ina nápo atëpatërin. Inapoaton Saromonso', a'napitarë chachin Yosë chinotacaso pëi Sinioro marë' acorin.

<sup>64</sup>Naporo tahuëri chachin copirnosos', i'iratë huáncana nininquë, Yosë marë' acorin. Inaso i'iratë', Yosë chinotacaso pëi ya'coananën notënanquë ya'huërin. Inaquë oshanëna marë'

ma'sha tëpapisopita, ya'ipi ahuiquitopi. Trico pochin nipisopita quëshipsisonta', Sinioro marë' a'nopi. Nanan anoyatopiso marë' ma'sharo'sa tëpapiso' tomaquëonta', Sinioro marë' inaquë ahuiquitopi. Sha'pi hua'na artaroso', Yosë pëinën notënanquë acopirinahuë', hua'huishin ni'ton, co inaquë inapita ahuiquitacaiso nanirinhue'. Napoaton i'iratë huáncana, inapotopi. <sup>65</sup>Naporo' Saromonso israiro'sapitarë', hua'hua'yátërahuë niyontonpi. Amato ninano quëran huarë' o'mapi. Inaso ninano', pëtëtë parti ya'huërin. Iquipito i'sha itopi quëraonta', huëntapi. Inaso' i'sha pë'natë parti ya'huërin. Iquipitoto'sa no'pa' mapiso' nanirinquë ya'huërin. Imënamëa'huaro'sa pita itopiquë napopi. Sinioro chinotatona capa cancantacaiso marë' napopi. Ina pita na'huëhuachinara, Yosë pëinën Sinioro marë' acoatona', canchisë tahuëri chachin pita niantapi. Ya'ipiya quëran shonca catapini tahuëri pita na'huëpi. <sup>66</sup>Tahuërininquë Saromonso', israiro'sa nontahuaton, ya'huëpi'pa' a'parin. Inahuarinta copirno nontahuatona', ya'huëpi'pa' paantapi. Siniorori Tapi catahuarinso' yonquipi: “Ma noyacha Siniorori piyapinën catahuarin paya. Canpoanta', na'con catahuarinpoa'” topi. Ina yonquiatona capa cancantë-rë'nachin ya'huëpi'pa' paantapi.

### Yosë Saromonë' anoyatërinso'

**9** <sup>1-3</sup>Saromon Yosë chinotacaso pëi', inaora hua'anëntacaso pëi', inapita tënirin. Naporahuaton ma'pitaso nicaso' yonquirinsopitanta', tënirin. Inapita tënihuachina, naquëranchin Siniorori ya'nootaantarín. Capaonquë ya'notërinso pochachin nitaton, itapon: “Pëi anitatonco nontërancoso marë' nani natananquën. Napoaton inaquë nontinacosos

marè' acorahuè. Ina yonquiato cari a'pairápo. <sup>4</sup>Quémaso' tataparinco pochachin cancantaton natëco. Ama nonpinaton, canamaso yonquiquësohuè'. No'tëquénáchin piyapi'sa yonquirapiquè'. Nani carima pënënanquëma'. Nani anitotëranquëma no'tëquën natëamaco'. Canpita capininta onpopinsona nini'camaso', nani anitotëranquëma'. <sup>5</sup>Ina pochin nipatan, quémá quëran pipipisopitaráchin israiro'sa hua'anëntapona'. Tataparinco nani sha'huitërahuè: 'Ca nohuanto quémá quëran pipipisopitaráchin israiro'sa hua'anëntapona', itërahuè. <sup>6-7</sup>Napoaponahuè', quëmahuè nipon, quémá quëran pipipisopitahuè nipon, pënëntërahuësopita, camaitërahuësopita a'poatoma', nisha nisha mamanshiro'sa moshahuatama', israiro'sa no'pa' quëtërahuè quëran ocoiarahuè. Chinotamacoso marè' pëi acorahuësonta', a'poarahuè. Inapotohuatënuquëma', nisha nisha nacionquë ya'huëpisopita tēhuayatáponënuquëma'. <sup>8</sup>Iso pëi noyápiachin nipirinhüè', ca nohuanton inimicoro'sari ohuatohuachina', na'piro'sara' yamorápon. Ina nicatona na'huëro'saso', tēhuapona'. Tēhuapona pochin inahua capini ninatapani: '¿Onpoatoncha Siniotori napotërin nicaya?' niitapona'. <sup>9</sup>Naporo' a'nari itapon: 'Siniotori nosoroaton shima-shonënapita Iquipito quëran ocoirin. Ocoipirinhüè', inapitaso nisha nisha mamanshiro'sa moshacaiso marè' ina a'popi. Napoaton Yosërinta inapita a'porahuaton po'pin aparisitërin,' itapon,' itërin.

**Sapa no'pa' copirnorì,  
Saromon nicapon huè'ninso'**

**10** <sup>1</sup>Sapa no'pa' copirnosò', sanapi. "Saromon Yosëri catahuarin ni'ton, yonquínahuan,"

topiso' natantërin. Ina natantaton yatëninrin: "Tēhuëchachin yonquínahuan nipachin, sacai' yonquicaso nininsopita natanpato, a'paniponco," ta'ton, Quirosarinquè huè'nin.

<sup>2</sup>Chini chiníquën nanantopisopita hua'ano'sari ca'tanpi. Camiyonënpitaquë pimo hua'sairo'sa', oro, na'pira'hua pa'ton nininsopita, inapita notohuaro' quënin. Saromonquë canquihuachina, tēnicaso marè' ma'pitaso yanataninsopita natanin. <sup>3</sup>Natanpachina, inariso ya'ipi no'tëquën a'panirin. <sup>4</sup>Ya'ipi no'tëquénáchin a'panitërinso natanaton: "Tēhuëchachin iso quëmapiso', yonqui yonquínahuan," tënin. Hua'anëntërinso pëi anitërinsona', ni'nin. <sup>5</sup>Misanënuquë na'a noya cosharo capacaiso marè' acopiso', hua'ano'sa ya'huëcaiso marè' noyápiachin patoanaro'sa acotërinso', piyapinënpita, o'shina'pi hua'ano'sanënpita, onpo sacatopiso', onpo a'moanpiso', corto hua'ano'santa Sinioro marè' noya ma'sharo'sa tēparahuatona ya'ipi ahuiquitopiso', ya'ipi inapita ni'nin. Ya'ipi inapita ni'sahuaton, pa'pi pa'yantërin.

<sup>6</sup>Pa'yanaton Saromon itapon: "Ya'huërahuësò parti, yonquínahuan ninanso' natantërahuè. Ma'pitasona ninansopitanta', natantërahuè. No'tëquën sha'huitërinaco, tēnahüè. <sup>7</sup>Sha'huitopirinacohüè', co natëtërahuè'. Caora chachin huëcato ni'ca'huarè' natëtërahuè huachi. Nitotëransopita, ma'sha ya'huëtërinquënsopita, inapita sha'huitopirinacohüè', co nanirinso chachin sha'huitërinacohüè', tēnahüè. <sup>8</sup>¡Sa'anpita, ya'ipi piyapinënpita, inapita nóya ya'huëpi ni'nahuè! Inapitaso' nani tahuëri nonanso' natanápatona', capa cancantopi, tēnahüè. <sup>9</sup>Siniorosò Yosënën ni'ton, noya nicatënuquën acorinquën israiro'sa hua'anëntamaso marè'. Inaso',

israiro'sa nosororinso' co onporonta nishatarinhuë'. Napoaton, no'téquën hua'anëntacaso marë' acorinquën. ¡Ma noyacha Sinioroso paya!'' itërin.

<sup>10</sup>Napotahuaton cara huaranca iscon pasa saota shonca quiro quë'ninso', oro quëtërin. Na'pira'hua pa'ton nininsopita, pimo hua'sairo'sa', inapitanta notohuaro' quëtërin. Co onporonta ina nápo pimo hua'sai' israiro'sa ya'huë-piquë, quëchinpihuë'. <sup>11-13</sup>Saromoninta notohuaro' ma'sha nicanarin. Naporahuaton ma'pitaso nataninsopita quëtërin. Ina piquëran Sapa copirnosó', ca'taninsopitarë chachin ya'huërin'pa' panantarín.

Naporahuaton Iran copirno nanchanënpitanta', pa'anamarë' pa'pi quëran, oro quëpi. Opiro parti quëran quëpi. Notohuaro' santaro nontë', na'pira'hua pa'ton nininsopita, inapitanta quëpi. Ina santaro nontë quëran Yosë chinotacaso pëiquë nanpënano'sa ya'huërinso', matatona nanpëcaiso' acotëra'piapi. Hua'anëntërinso pëiquënta', inapotopi. Arparo'sa', guitarra pochin nipisopita, inapitanta pi'nina'piro'sa marë' ina nontë quëran chachin nitopi.

### Saromon ma'huanaton nahuinso'

<sup>14-15</sup>Nani pi'iquë ma'sha pa'ana'piro'saso', Israiro no'paquë Saromon copirno pahuërëpi. Arapia parti copirnoros'a ya'huëpisopitarinta', ina pahuërëräpi. Ya'ipi Israiro huëntono'saquë chirinchi-ro'sa ya'huëpisopitarinta', pahuërëräpi. Inapitari pahuërëpiso' aquëtë Saromonso', cato shonca cato huaranca quiro oro quë'ninso' nani pi'iquë ma'patërin. <sup>16</sup>Notohuaro' oro ya'huëtaton Saromonso', cato pasa iscoto inaquëran anitërin. Pancaráchin anitërin. A'naya a'naya saota quiro quë'ninso' anitërin.

<sup>17</sup>Ina nápo anitahuaton, cara pasa isco-toa'huanta oro quëran chachin anitaantarin. A'naya a'naya quiro miria na'con quë'ninso' anitërin. Nani anitahuaton: "Nipano tanan pëi!" itopiquë acorin.

<sup>18</sup>Hua'anëntacaso shiranënta', huiri pomon quëran anitërin. Nani tënihuachinara, oro quëran ya'ipi pashitopi. <sup>19</sup>Ina shiraso', nanpënan ya'huëtërin. Saota achinahuan. Pisanamënta', tahuishin miachin. Huënsërinso', panca na'huëtërin. Tanpaquën ya'nanacaso marënta', cato tëranchin ya'huëtërin. Inapita pirayan, a'natëran, a'natëran pa'pini' nonanpiso' huaniárin acopi. <sup>20</sup>A'naya a'naya achinano'saquënta', cato cato pa'pini' nonanpiso' acora'piapi. A'natëran a'natëran a'nara acopi. Ya'ipiya quëran shonca cato ya'huërin. ¡Co onporonta a'na parti ina shira pochin nichinpihuë'!

<sup>21</sup>O'orinquë minëro'santa', oro quëransáchin nipi. "Nipano tanan" itopiso pëiquënta coshatacaiso marë' ohuarapisopitaso', inanpi quëransáchin nipi. Co manta prata quëranso ya'huërinhuë'. Naporo tahuëri'saso', na'con na'con oro ya'huërin ni'ton, prataso', co aquëtë pa'tërinhuë'. <sup>22</sup>Tarsis ninano itopiquë Saromonso' nancharo'sa anitërin. Inapitaquë piyapinënpitari nani cara pi'ipi quëran oro quëshipi. Prata, huiri pomon, tanpahuano'sa', nisha huaro huaroro'sa', inapita quëshipi. Iran copirno nanchanënpitarë chachin pa'sahuatona quëshipi. <sup>23</sup>Saromon copirnosó', ya'ipi isoro'paquë copirnoros'a na'huëtërin. Ma'huanin quëran na'huëtahuaton, yonquínahuan ninin quëraonta', na'huëtëra'piarin. <sup>24</sup>Napoaton naní quëran yani'pi. Nonin-sonta yanatanpi. Yosëri yonquínahuan acorin ni'ton, yanatanpi. <sup>25</sup>Naporahuaton nani pi'iquë ma'sha tëranta quëpatopi nicanacaiso marë'. Prata



quëran nipiso', oro quëran nipiso', a'mocaiso nipisopita, ahuëtacaiso marë' ohuarapisopita, cosharo apimotacaso marë' ya'huërsopita, cahuarioro'sa', moraro'sa', inapita quëpatopi.

**Saromon toronano'sa',  
cahuarioro'sa', inapita  
pa'aninso'**

<sup>26</sup>Saromon toronano'sa pa'anahuaton, cahuarioquë pa'napiro'santa camairin. Huaranca catapini pasa toronano'sa ya'huëtërin. Cahuarioquë pa'napiro'santa shonca cato huaranca camairin. Inapitaso' nisha nisha ninanoro'saquë acorin. Ahuëtacaiso toronano'sa acorinquë, acora'piarin. Napopinchin Quirosarinquë a'paito sontaro'sa ya'huërsinquënta acorin. <sup>27</sup>Pa'pi notohuaro' prata Quirosarinquë ayontonin. Na'piro'sa pochin ana'atërin. Nonaranta', ana'atërin. Canonquë tanan iquiraro'sa na'arinso nápo ana'atërin. <sup>28-29</sup>Cahuarioro'saso', copirno marë' ma'sha pa'anpisopitari Iquipitoquë pa'anpi. Sisiria partinta pa'anpi. Inaquëpita noya noya cahuarioro'sa ya'huërin ni'ton, napopi. Pa'anatona copirno nanchanënpitaquë, israiro'sa ya'huëpiquë a'paintapi. Iquipitoquë toronan pa'anpachinara, saota pasatë' coriqui marë' pa'anpi. Ina coriquiso', prata quëran ninin. Ya'huërë' a'nara cahuarioso pa'anpachinara, pasa a'natërápo shoncatë' marë' pa'anpi. Iti copirnoros'a', Siria copirnoros'a', inapitanta huë'sahuatona', ina cahuarioro'sa', toronano'sa', inapita pa'anquipi. Copirno marë' ma'sha pa'anpisopitari pa'antopi.

**Israiro'sa cato huënton  
ocoicaiso' sha'huirins'o'**

**11** <sup>26</sup>Hua'qui quëran a'na hua'ani Saromon chinitërin. Inari chachin hua'an acopirinhue', naporin.

Inaso' hua'an Napato hui'nin Quiropoamo itopi. Inaso', Sirita ninano itopiquë ya'huërin. Iprain israiro'sa no'panënuquë ya'huërin. Pa'pinso' nani chiminin. A'shins'o', Sirohuia itopi. Inaso quëyoron. <sup>27</sup>Onpoatonsona copirno chinitërinso', sha'huichinquëma nitotoco': Inanta Saromon marë' sacatërin. Tapi ninanonën itopiquë no'pa' amëntarotahuatona', pairanën anoyataantapi. <sup>28</sup>Saromoni chiniquë hui'napi nicaton, sacato hua'an nicacaso marë' acorin. Iprain, Manasisi, inapita huëntonosaquë sacatoro'sa ya'huërsinso', camaicaso marë' acorin. Inapitaso', Cosi shinpita.

<sup>29</sup>A'na tahuëri Quiropoamoso', Quirosarin quëran ni'tapon pa'nin. Naporo' iraquë, a'nara pënëntona'pi nasha capaquë niimotopinan nacapirin. Inaso', Aiasi itopi. Siro ninanoquë ya'huërin. Inahuaráchin inaquë nisapi. <sup>30</sup>Naporo' Aiasiso', nasha capa manin. Osharahuaton shonca cato osërarin. <sup>31</sup>Inaporaahuaton, Quiropoamo itapon: "Shonca osharahuëso', quëmari maquë'. Sinioro israiro'sanpoa chinotërehuaso napotërsinquë: 'Saromon hua'anëntërsinso osëretahuato, shonca huënton quëmari hua'anëntacaso marë' quëtaranquë.

<sup>32</sup>Saromonso' a'na huëntoinchin hua'anëntapon. Piyapinëhuë Tapi itopiso' noya nicato napotarahue. Quirosarinta cari huayonahuë inaquë pëinëhuë ya'huëcaso marë' ni'ton, nosororahuë. Napoaton ina pochin nisarahue. <sup>33</sup>Saromonso' a'porahuatonco, mamanshiro'sa moshapatërin. Siton mamanshi paya Asotariti itopiso' mosharin. Quimosi itopisonta mosharin. Inaso', moaporo'sari mosharinso'. Mircon itopisonta mosharin. Inanta amonosari mosharin. Inapoonco costarincosohue' ninin. Pënëntërahuësopita, anitotërahuësopita, inapita co inaso pa'pinco pochin natërinhuë'

ni'ton, napotarahüë. <sup>34</sup>Napoapona-huë', ya'ipi hua'anëntërinso co ipora osërëtarahuë'. Pa'pinco' noya nicato, chiminaquë huarë' hua'anëntacaso quëtarahuë'. Tapiso' iráca nanpipon, pënëntërahuëso', camaitërahuëso', inapita natërin ni'ton, napotarahüë. <sup>35</sup>Hui'nini ya'huërëtohuachin, naporu huarë' hua'anëntërinso osërëtarahuë'. Ina osërëtahuato, quëma huachi shonca huënton nininso' hua'anëntacaso marë' quëtaranquën. <sup>36</sup>Hui'ninso' a'na huëntoínchin hua'anëntapon huachi. Tapi quëran pipirinsu' Quirosarinquë hua'anëntacaso marë' napoarin. Inaquë chinotiinacoso marë' huayonahuë ni'ton, napoarahüë. <sup>37</sup>Quëmaso nipirinhuë', acoaranquën na'con na'con israiro'sa hua'anëntacaso marë'. Onposo' no'pa' hua'anëntamaso nohuantohuatan, hua'anëntaran. <sup>38</sup>Ya'ipi camairanquënsopita natëton noya nipa-tanso', noya ni'saranquën. Tapiso' iráca nanpipon, pënëntërahuëso', camaitërahuëso', inapita natërin. Ina pochin quëmantata natëhuatanco, carinquën catahuanranquën ni'ton, quëma quëran pipipisopitaráchin israiro'sa hua'anëntapona'. Tapi sha'huitërahuëso' chachin quëmantata nitaranquën. <sup>39</sup>Tapi quëran pipipisopitaso', Saromon tëhuërinso marë' ana'intarahüë. Napoaparahüë', co ana'intomiatapohuë', tënin Sinioro," itërin.

<sup>40</sup>Napotërinso natantaton, Saromonso Quiropoamo yatëparin. Inaso napoapona-huë', Iquipitoquë ta'arin. Saromon chiminaquë huarë' inaquë yacapatërin. Naporu' iquipitoro'saso', Sisaco copirno itopisoari hua'anëntërin.

### Saromon chimininsu'

<sup>41</sup>Saromon hua'anëntapon naporinsu', yonquínahuan nininso', inapita a'na quëmapiri ninshitërin. "Saromon

hua'anëntapon naporinsu'," ta'ton ninshitërin. <sup>42</sup>Saromonso', Quirosarin quëran ya'ipi israiro'sa hua'anëntërin. Catapini shonca pi'ipi hua'anëntërin. <sup>43</sup>Ina quëran chiminpachina, Tapi ninanonën itopiquë pa'pitopi. Ina piquëran hui'nin Nopoamo itopisori ya'huërëterin huachi.

### Israiro'sa cato huënton ocoipiso'

**12** <sup>1-3</sup>Nopoamoso', Siquimoquë pa'nin. Inaquë israiro'sa nani niyontonpi: "Nopoamo copirnonënpoa ya'conin huachi," ta'caiso marë' niyontonpi. Naporu' Quiropoamoso', Iquipitoquëranchin nisarin. Saromon ta'ananpitan pa'ninquëranchin ya'huëarin. A'naquëni Nopoamori israiro'sa hua'anëntërinso', sha'huitopi. Napohuachina, Iquipito quëran pipirahuaton ya'huërinquë chachin huënantarin. Israiro ansiano'sari amatohuachinara, ya'ipi hua'ano'sapitarë chachin Nopoamo nontacaiso marë' paapapi. Quënanconahuatona itapona:

<sup>4</sup>—Tatacoso', chini chiniquën asacatërincoi. Naporahuaton, copirno marë' nininso' na'con apahuërëterincoi. Inapoato'i parisitërai. Quëmaso' ipora sanoanan quëran camaicoi. Pahuërëta'huaiso' nininsonta amashamiachin a'pamaquë'. Inapohuatan, noya natërainquën, itopi.

<sup>5</sup>—Noyapa'. Yonquiri'i nipachin. Iporaso pa'sahuatoma', cara tahuëri quëran huëantaco'. Naporu' sha'huitaranquëma yonquirahuëso', itërin. Napotohuachina, inahuaso pa'pi.

<sup>6-7</sup>Nani pa'pachinara, Nopoamoso pa'pinco' catahuaninsopita ansianoro'sa amatërin. Ma'sona nicacaso natanpachina, inahuariso sha'huitopi:

—Tëhuënachachin israiro'sa natëinquënso nohuantohuatan, nataninëinquënso chachin nitëquë'. Ama huachi co'chachin asacatëquësohuë'. Naporahuaton pahuërëta'caiso' nininsonta', a'pamaquë', itopi.

<sup>8-11</sup>Napotopirinahuë!, inariso co natërinhuë!. Co natëtonhuë!, a'napita hua'ano'sa co masho nipisopitahuë! amatërin. Huë'pachinara, inahuanta ina chachin natanin. Natanpachina, inahuariso itapona!:

—Ama huachi co'chachin asacatocoi-sohuë!. Naporahuaton pahuërëta'huaiso nininsonta!, a'pamaquë!, itërinën. Napotërinënsopita, iso pochin sha'huitëquë!: “Tatahuëso! chiniquën asacatërinquëma!. Carimaso nipirinhüë!, chini chiniquën asacataranquëma!. Na'con pahuërëtcaso! camairinquëma!. Caso nipirinhüë!, na'con na'con pahuërëtcaso! camairanquëma!. Inaso!, sintoron quëran ahuihuitërinquëma!. Carimaso nipirinhüë!, hua'nara'huaquë motoanpinan huihuitiinanquë, ahuihuitaranquëma!” itëquë!, itopi.

<sup>12</sup>Cara tahuëri quëran Quiropoamoso!, a'napitarë chachin Nopoamo paapantapi. Sha'huitërinso chachin nipi. <sup>13</sup>Paapantapirinahuë!, inariso co yainhuë! nontërin. Co ansianoro'sari pënëninso pochin sha'huitërinhuë!. <sup>14</sup>A'napita hua'ano'sa co masho-huë! nipisopitari pënëninso! sha'huitërin: “Tatahuëso! chiniquën asacatërinquëma!. Carimaso nipirinhüë!, chini chiniquën asacataranquëma!. Copirno marë! nininsota! na'con pahuërëtcaso! camairinquëma!. Caso nipirinhüë!, na'con na'con pahuërëtcaso! camairanquëma!. Inaso!, sintoron quëran ahuihuitërinquëma!. Carimaso nipirinhüë!, hua'nara'huaquë motoanpinan huihuitiinanquë ahuihuitaranquëma!” itërin. <sup>15</sup>Inapoaton Nopoamoso!, Israiro hua'ano'sari natanpiso!, co natërinhuë!. Siniorori Aiasi quëran Quiropoamo sha'huitërinso! nancaso marë!, naporin.

<sup>16</sup>Copirnorori napotërinso! Israiro hua'ano'saso!, natanpi. Ina natanatona!: “¡Co'chi natërinpoahuë! paya!” topi. Napoatona copirno chiniquën nontopi: “Tapi quëran pipipisopita, co huachi hua'anëntiincoiso ya'huërinhuë!.

Quisi chiminpachina ma'sha-nënpita Tapiri manin.

Co ina quëran canpoaso! ma'sha tëranta manëhuahuë!.

Ma topinanta shinpita natërëparihua!. Napoaton, ¡huëco patahua huachi! Sacatatón inanta!, hui'ninpita nocoma'in,” itopi.

Napotatona!, inapitasa ya'huëpi'pa'pa'pi huachi. <sup>17</sup>Ya'huëre! Cota huënton israiro'saso!, Nopoamo copirno natëpi.

<sup>18</sup>Israiro hua'ano'saso!, no'huitatona pa'pi. Paasoi chachin Nopoamoso!, Sacato hua'an Atoramo itopiso! a'parin. No'huitatona pa'sapisopita noya nontaton asanocaso marë! a'parin. A'paporinhüë!, inapitariso na'piquëtatona tëpapi. Ina nitotaton Nopoamoso!, a'naroáchin toronanënuë nanpëaton Quirosarinquë ta'arin. <sup>19</sup>Ina pochin shonca huënton israiro'saso!, Tapi quëran pipirinsota! copirno a'popi. Napoaton iso quirica ninshitasoco huarënta ina chachin nisapi.

<sup>20</sup>Quiropoamo Iquipito quëran huënantarinso!, ya'ipi israiro'sa natantopi. Ina quëran niyontonahuatona!, amatopi. Canquihuachina, shonca huënton israiro'sari, copirnonëna nicacaso marë! acopi. Cota huënton israiro'saráchin Tapi quëran pipirinsota! copirno natëpi.

<sup>21</sup>Nopoamoso! Quirosarinquë canquihuatón, pasa posa shonca huaranca sontaro'sa ayontonin. Cota, Mincamin, inapita huëntono'sa quëran ina nápo ayontonin. Shonca huënton israiro'sa ahueatona, naquëranchin hua'anëntaantacaso marë! naporin.

<sup>22</sup>Napoporinhüë!, Yosëri Simaiasë itopiso nontaton camairin:

<sup>23</sup>—Paaton Nopoamo nontoonquë!. Cota, Mincamin, inapita sontaro huëntono'santa nontoonquë!: <sup>24</sup>“Naporin Sinioro: ‘Carima camairanquëma ama iyamapitarë! quëma niahuëcamaso marëhuë!. Ca

nohuanton piyapinëhuëpita cato nacion ya'huëapón. Napoaton ya'huëramaquë panantaco', ténin Sinioro," itëquë', itërin. Cantonahuaton, inaso Siniorori camairinso sha'huitërin. Ina natanatona', inahuaso camaitërinso chachin nipi. Co huachi ahuëtacaiso marë' pa'pihuë'.

### Quiropoamo mamanshi moshacaiso camaitërinso'

<sup>25</sup> Quiropoamoso' copirno ya'conahuaton, Siquimo ninano noyá acorin. Inaso ninano', Iprain israiro'sa no'panëncuë ya'huërin. Noyá acorapiton inaquë ya'huërin huachi. Ina piquëran Pinoiro ninano itopisonta noyá acorapirin.

<sup>26-27</sup> Oshaquëran yonquiaton tapon: "Israiro'saso', Sinioro chinotacaiso marë' ma'sharo'sa Quirosarinquë tëpapi. Ina marë', pa'sápachina', ma'shátërahüë Nopoamo noya niantapona'. Napohuachina tëparahuatonaco Nopoamo natëantapona'. Inapohuachina, Tapi quëran pipirinso chachin ya'ipi israiro'sa hua'anëntaantapon," ténin yonquiaton.

<sup>28</sup> Inapo yonquirinso hua'ano'sa sha'huitërin. Inapitarë nonsahuaton, cato toroa'hua oro quëran anitërin. Tënihuachinara israiro'sa itapon: "Canpoaso israiro'sanpoa', nani na'aro Quirosarinquë pa'nëhua'. Ma'tana yosënënpopita. Isopita mini Iquipito quëran ocoiripoa'," itërin.

<sup>29-30</sup> Napotahuaton piyapinënpita camairin a'nara Pitiriquë acocaiso marë'. A'naso nipirinuë', Tano nina-noquë acopi. Napohuachina israiro'saso', a'naquën Pitiriquë pa'pi. A'naquëonta', Tano ninanoquë pantapi. Toroa'hua-ro'sa moshacaiso marë' inaquëpita pa'sápatona', co huachi Yosë chinotacaiso marë' Quirosarinquëso pa'pihuë'. Inapoatona israiro'saso', oshahuanpi.

<sup>31</sup> Naporahuaton Quiropoamoso', inahuara nohuanton artaroro'sa na'con

na'con anitërin. Inaquëpita corto hua'ano'sa pochin sacatacaiso marë' topinan israiro'sa acorin. Co Nihui huënton israiro'sa acorinuë'.

<sup>32-33</sup> Nasha pita na'huëcaiso marënta', inaora yonquinën quëran ocoirin. Ina pitaso', pascoa yoqui quëran canchisë yoqui nisahuaton shonca a'natëräpo tahuëritahuaso', na'huëpi. Cota huënton israiro'sa Quirosarinquë niyontonatona pita na'huëpiso pochin ninin. Quiropoamo chachinta', toroa'hua nonanpiso' moshacaso marë' Pitiriquë yápa'marin. Inaquë ma'sharo'sa tëparahuaton nonanpiso' mosharin. Naporahuaton ina moshaton yonarin pochin nininso' a'përin. Inaora nohuanton artaroro'sa acorinquë sacatacaiso marënta', corto hua'ano'sa acora'piarin.

### Acapo copirno ya'coninso'

**16** (Nopoamo chiminpachina, hui'nin Apiamo itërinso Cota huënton copirno ya'conin. Inanta chiminpachina, hui'nin Asa itërinsoari ya'huëretërin. Quiropoamonta chiminpachina, hui'nin Natapo itërinsoari israiro'sa hua'anëntaantarin. Inaso napoaponahuë', Isacaro huënton quëmapi Paasa itopisoari tëparin. Inapotaton ya'huëretërin. Inanta chiminpachina, hui'nin Ira itërinsoari ya'huëretërin. A'nara sontaro hua'ani napoaponahuë', tëparahuaton inanta ya'huëretërin. Inaso', Simiri itopi. Napoaponahuë', inanta' a'nara sontaro hua'ani tëparahuaton ya'huëretërin. Inaso', Omiri itopi.)

<sup>29</sup> Cota huënton copirno Asa itopisoso', cara shonca posa pi'ipitarin. Inanapo pi'ipitaso', Omiri hui'nin Acapo itopiso ya'huëre', israiro'sa hua'anëntacaso marë' ya'conin. Inaso ya'conin quëran huarë', cato shonca

cato pi'ipi isairio'sa hua'anëntërin. Samaria ninanoquë ya'huëaton naporin. <sup>30</sup>Napoaponahuë', pa'pi co noyahuë' ninin. Ina marë' Sinioroso' co noyahuë' cancantërin. <sup>31</sup>Quiropoamo iráca co noyahuë' ninin. Acaposo nipirinhüë', na'con na'con co noyahuë' ninin. Canaan sanapi Quisapira itopiso' macaton, naporin. Quisapiraso' pa'pin, Iti-paaro itopi. Inaso Sitonquë copirno ya'coninso'. Inapitaso' Paaro mamanshi moshapi ni'ton, Acaponta ina moshapatërin. <sup>32</sup>Samariaquënta', a'nara Paaro moshacaiso' pëi artarorë chachin anitërin. <sup>33</sup>Naporahuaton naranta moshacaiso marë' ahuanirin. Ina naraqüë chachin Asira itopiso' mamanshi nonanpi. Inapita anitërinso marë' Siniorori Acapo no'huirin. A'napita copirno-ro'sa no'huirin quëran, na'con na'con ina no'huirin.

<sup>34</sup>Acapo hua'anëntaso tahuëri'sa', Quirico ninano iráca ata'huantopiso', anoyataantapi. Pitiriquë a'nara Isairio quëmapi ya'huërin, liri itopiso'. Ina caniaritërin quëran simintonën acopi. Naporo chachin hui'nin paninantërinso', chiminin. Inaso', Apiramo itopi. Napoin quëran payora a'canin. A'canahuaton onconano'sa acoaso chachin, huinshoin ya'huërë' chimiantarin. Inaso', Sicopo itopi. Siniorori iráca Cosoi napotërinso chachin ninin.

### Pi'imiatacaso Iniasë sha'huirinsó'

**17** <sup>1</sup>Carata parti, Tisipi ninanoquë a'nara pënëntona'pi ya'huërin. Inaso', Iniasë itopi. A'na tahuëri inaso', Acapo paaparahuaton itapon: “Sinioro chinotërëhuaso ya'huërin ni'ton, caso inasáchin natërahuë. Ina camairinco ni'ton, no'tëquën sha'huitaranquën. Ipora quëran huarë' co huachi o'nanaponhuë'.

Co poroncayo tëranta ya'huëaponhuë'. Ca sha'huianta'huarë' ya'huëantapon. Co Sinioro natëtonhuë' oshahuananso marë' ina pochin ana'intarinquën,” itërin. <sup>2</sup>Ina quëran Siniorori Iniasë itapon: <sup>3</sup>“Cortanii' aquëtëran pi'i pipirinsó parti pa'sahuaton, Quiriti i'shaquë na'pipon pochin ya'huëconquë'. <sup>4</sup>Ina i'sha o'osaran. Naporahuaton nani cari itatano'sa camairahuë coshoro quëpatiinënquënso’,” itërin.

<sup>5</sup>Napotohuachina, inaso ina inachachin ninin. Cortanii' aquëtëran pi'i pipirinsó parti pa'sahuaton, Quiriti i'shaquë ya'huëconin. <sup>6</sup>Inaquë itatano'sari nani tashiramiachin nani i'huaraya nosha, pan, inapita quëpatopi. Yamorohuachina i'sha o'orin.

<sup>7</sup>Napoápirinhüë', hua'qui quëran ina i'shaso', yanirin. Co o'naninhüë' ni'ton, naporin.

### Iniasë quëyoroni nocomarinso'

<sup>8-9</sup>Napohuachina Siniorori Iniasë itaantapon: “Iporaso', Saripita ninano itopiquë pa'sahuaton ya'huëconquë'. Inaso ninano', Siton parti ya'huërin. Nani inaquë a'nara quëyoron camairahuë nocomainquënso marë',” itërin.

<sup>10</sup>Napotohuachina, inaso Saripitaquë pa'nin. Ninano ya'coanaquë canconahuaton, a'nara quëyoron ihuë masarin quënanconin. Përasahuaton itapon:

—Yosë marë' canta imoya, pi'pian i'sha quëshico o'oi, itërin. <sup>11</sup>Inaso', i'sha matapon pa'sapirinhüë', naquëranchin përantarin. Huëantahuachina itapon:

—Yosë marë' paonta quëshico topirahuë, itaantarin. <sup>12</sup>Napotaantahuachina, inariso itapon:

—Yoscoarë' co anpipinan ya'huëtërincohuë'. A'na sët'amofchin pochin orinanquë arina ya'huëcharinco. Tomanta yonshaquë pi'pisha ya'huëtërinco. Inaíchin anpiato

hua'huahuë a'ca'huaso marë' ihuë masa-pirahuë': "Ina pëlyachinatoï tana tēpa-china'incoi," ta'to naporapirahuë', itërin.

<sup>13</sup>—Ama imoya pa'yanquësohuë'. Paaton naporanso chachin anpiontaquë'. Napoaponahuë', ca'ton anpituahatonco quëshico ca'i. Ina piquëran canpitanta', capamaso marë' anpiontaquë'. <sup>14</sup>Sinioro isirairo'sacoi chinotëraiso', naporin: "Ca nohuanto arina orinanquë ya'huë-rinso', co nitiquiaponhuë'. Tomanta yonshaquë ya'huërinso', napoarin. Ca nohuanton o'nanpachin, cosharo ya'huëaquë huarë', ya'huëápon," tënin Sinioro, itërin.

<sup>15</sup>Napotohuachina, inaso ina inachachin ninin. Napoaton quëyoron, hua'huin, Iniasë, inapitaso hua'qui noya coshatopi. <sup>16</sup>Siniorori piyapinën quëran sha'huitërinso chachin arina, toma', inapita ya'huërinso', co nitiquirinhuë'. Ya'huërachinin.

<sup>17</sup>Hua'qui quëran quëyoron hua'huinso', caniorin. Chiniquën caniorahuaton, chiminaquë huarë' ninin. <sup>18</sup>Hua'huin chiminpachina, inaso Iniasë itapon:

—Quëmaso' Yosë nohuanton pënëntëran. ¡Co carinquënso', manta onpotëranquënhuë'! Co Yosë natëtohuë' oshahuanahuë. Napoaton ina ayonquiancoso marë' hua'huahuë tēpatëranco. ¡Inapotatonco ana'intëranco tēnahuë' itërin. <sup>19</sup>Napotohuachina, inariso itapon:

—Hua'huan quëshico, itërin.

Quëpatohuachina, matërin. Inapa pë'satëquë huë'ërinso patoana ya'huërin ni'ton, inatohua quëpantarin. Quëpantarahuaton, huë'ërinso pë'saranëncuë acoontarin. <sup>20</sup>Ina quëran chiniquën Yosë nontërin: "¡Sinioro quëmaso', Yosënhuëncuë! Iso quëyoronso' na'con nosororinco. Pëinëncuë chachin

ichiya'huërinco. Quëmariso napoaponahuë', hua'huin tēpataton, pa'pi asëtaran," itërin. <sup>21-22</sup>Napotahuaton chimipia'hua cararo ya'quëtërin. Inapotapon pochin chiniquën Yosë nontaantarin: "¡Sinioro quëmaso', Yosënhuëncuë! ¡Quëma nohuanton iso hua'huasha nampianta'in tēnahuë'!" itërin. Napotohuachina Siniorori a'paniton, quëmapia'hua ananpitaantarin.

<sup>23-24</sup>Naporo' Iniasëri quëmapia'hua maimirarahuaton, anohuaramarin. Inaquë a'shin quëtaton:

—¡Ni'quë imoya hua'huan nanpirin! itërin.

—Iporacha tēhuëncinso' Yosë piyapinën ninanso' noya noya nitotërahuë huachi. Ma'sona tëranta quëmaso' topatan, Sinioro anitotërinquënso no'tëquën sha'huiaran, itërin quëyoron.

#### Iniasëri Acapo nontaantarinsó

**18** <sup>1</sup>Cara pi'ipi Isirairo no'paquë co manta o'naninhuë'. Ina piquëran Siniorori Iniasë nontaton itapon: "Paaton Acapo nontaantaquë'. Ca nohuanton o'nanapon huachi," itërin.

<sup>2</sup>Napotohuachina pa'nin. Samariaquë canquirahuaton ni'pirinhuë', piyapi'sa tanarotatona pa'pi chiniquën parisitapi. <sup>3-4</sup>Iniasë Samariaquë huëcaso', Acaponta piyapinën Apitiasë itërinso' nontacaso marë' përarin. (Apitiasëso', ya'ipi cancanën quëran huarë' Sinioro chinotërin. Napoaton pënëntona'piro'sa nosoroaton catahuarin. I'hua chachin Quisapirari sontaro'sa camairin inapita tēpacaiso'. Napohuachina Apiasëso', pasa pënëntona'pi masahuaton po'orin. A'natërápo shonca, a'natërápo shonca acorahuaton, cato motopi nanino'saquë po'orin. Inapotahuaton, a'carárin.)

<sup>5</sup>Apitiasë canquihuachina Acapo copirnorri itapon:

—Niquë niquë paatëhua ya'huërëhuaso no'pa', pa'tahua'. Iro'sa', huinano'sa', inapita ya'huërinquë pë'tahuaros'a quëpa'ahua'. Pasto quënanpatëhua', inaquë cahuarioro'sa', moraro'sa', inapita a'ca'ahua'. Co'so' inapohua-tëhuahuë', ya'ipi taquiapona', itërin.  
 6Napoatona niquë niquë pa'pi.

7Aptiasëso', iraquë Iniasë nacapiaton, pa'yanin. Ina quëran mónsho tahuaton:  
 —¿Quëma ta'ma sinioro, Iniasënquën nica? itërin.

8—Ca mini. Paaton Acapo sha'hui-tëquë yanontërahuë, itërin Iniasëri.

9—¡Acapo napotohuato, co manta onpopirahuë' tëpaponco caso! 10I'hua chachin inaso', comisiono'sa nisha nisha parti a'parin yoniinënquënso marë'. Nisha nisha nacionquë pa'pirinahuë', co quënaninënhuë'. Huënantatona sha'huihuachinara: “¿Yoscoarë' co quënamahuë'?” itërin copirnor. Napotohuachina, inapitaso': “Nonpin-patoiso', Yosë ana'inchincoi” topi.  
 11-12Po'pin yonípirinënhuë', co quënaninënhuë'. Iporaso': “Paaton copirno sha'huitonquë yanontërahuë,” itëranco. Pa'nahuëso' Sinioro ispiritonën niquë'pa' quëpaantaponquën. Copirno huë'pachin co quënanquiponquënhuë'. Inapohua-chin, inaso atëpataponco. Hui'napitapo quëran huarë' Yosëchin pa'yatopirahuë, inapotaponco. 13I'hua chachin Quisapirari sontaro'sa camairin pënëntona'piro'sa tëpacaiso'. Napohuachina, cariso' pasa pënëntona'pi po'orahuë. A'natëräpo shonca, a'natëräpo shonca acorahuato, cato motopi nanino'saquë po'orahuë. Inapotahuato, a'carárahüë. ¡Co a'na ina nitotomaranquënhuë'!  
 14¡Acapo yanontëranso sha'huito huato, inaso huëntapon. Napoaponahuë' co quënanpachinquënhuë', tëpaponco caso! itërin Aptiasëri.

15—Sinioroso' ya'ipi nanitaparin. Ina marë' sacatato no'tëquën sha'huitaran-quën. Ipora tahuëri chachin Acaporo'co nona'huaso ya'huërin, itërin Iniasëri.

16Napotohuachina Aptiasëso', Acapo yonípon pa'nin. Quënanconahuaton, Iniasëri yanontërinso sha'huitërin. Ina natanahuaton nicapon pa'nin.

17Ipora quënanapon chachin Acapori itapon:

—¡I'yan! Israiro'sa aparisitápiranhuë', nani quënananquën huachi, itërin.

18—Quëma tëhuëchins'o piyapinën-pitarë'quën chachin Sinioro camaitë-rinso a'poran. Ina a'porahuatoma nisha nisha mamanshiro'sa Paaro nonanpiso' mosharama'. Ina na'intërinquëma parisitarama'. 19Iporaso' Carmiro motopiquë israiro'sa ayontonquë'. Catapini pasa a'natëräpo shonca ya'pi Paaro marë' pënëntopisopitanta', përaquë'. Catapini pasa Asira marë' pënëntopisopitanta', huë'ina'. Inapitaso' Quisapirari pahuë-rërin, itërin Iniasëri.

#### Paaro marë' pënëntopisopita Iniasëri canarinso'

20Iniasëri napotohuachina Acaposo', israiro'sa ayontonacaiso marë' comisiono'sa a'parin. Ya'huërë' inaora chachinso', Paaro marë' pënëntopisopita Carmiro motopiquë ayontonin. 21Naporó Iniasëso israiro'sa ya'carirahuaton, itapon:

—Ama huachi cato imatocosohüë'. Sinioro Yosë nipachin inasáchin imaco'. Paaronta Yosë nipachin, ina nipachin imacoso', itërin. Napotohuachina co a'panitopihüë'. 22Iniasëriso', naquë-ranchin itaantapon:

—Casáchin Sinioro marë' pënënta-rahüë. Napoaponahuë' Paaro marëso', catapini pasa a'natëräpo shonca ya'pi ya'huëräpi. 23Inta nipachin, cato toroa'hua quëco'. A'nara Paaro marë'

huayonahuatona tēpa'ina! Nani tēpa-huachina artaronēnquē ihuē aipi acó'ina! Napoaponahué!, ama a'pērapichinaso-hué!. Ya'huērē! canta!, a'nara tēparahuato Siniro artaronēn aipi acorahuē. Napoaporahué!, co canta a'pērapitarahué!.<sup>24</sup>Nani acohuachina Paaro nonchina! Tēhuēnchachin Yosē nipachin ahuiquitacaso maré! pēn a'patimain. Canta inapotahuato, Siniro nontarahuē. ¡Insosona a'panitaton pēn a'paimahuachin, ina tēhuēnchachin Yosēso! itērin. Napotihuachina ya'ipi israiro'sari:

—¡No'tēquēn! Ina pochin niin, topi.

<sup>25</sup>Napohuachinara, Paaro maré! pēnēntopisopita Iniasēri itapon:

—Canpitaso na'aquēma ni'quēhuarē!, canpita'ton toroa'hua huayonahuatoma inapotérico!. Nani tapahuatama!, ama a'pērapitapomarahué!, mamanshinēma nontoco ahuiquitacaso maré!, itērin.<sup>26</sup>Napotohuachina inahuaso!, a'nara

toroa'hua huayonpi. Ina tēparahuatona artaro aipi acopi. Inapotahuatona tashiramiachin quēran camotēchin huaré! Paaro nontápi: “¡Paaro a'panicoi!” tosápi. Napoapona pochin, artaro conitatona pashi pashitērapí. Napopirinhahué! co a'panitērinhué!.<sup>27</sup>Camotēchin nispaso! Iniasēri tēhuarin:

—¡Chini chiniquēn nontoco! yosē inanta ni'quēhuarē a'paniinquēma!. Ma'sona nisamara. Chi'chiámara a'na, iyámara, ni'tapon pa'mara, hué!ésámara. ¡Hué!ésápachin ochinanco! itárin.<sup>28</sup>Napotápirinhué!, inapitaso chiniquēn: “Yai, yai,” tēcapona pochin conitapi. Cosoroa'huaro'saquē, nahuacaro'saquē, inaquēpita inahuara niohuanpitērapí. Inachintopi ni'ton, huēnai! amaquē huaré! inapopi.

<sup>29</sup>Napochináchin panca tēhuērēnin huachi. Siniro maré! ma'sha ahuiquitacaiso ora na'huēpirinhué!, co macari a'panirinhué!.

<sup>30</sup>Naporo! Iniasēri israiro'sa itapon:





—Iporaso', ya'ipinquëma yacaritoco', itërin. Napotohuachina, ya'ipi yacariipi. Iráca chachin inaquë Yosë marë' artaro acopirinahuë', ohuatopi. Ina chachin Iniasëri anoyatarin. <sup>31</sup>Ina marë' shonca cato na'piro'sa ohuatopiso' manin. Cacopo hui'ninpita ya'huërinso napochachin manin. Ina Cacopo chachin iráca Siniorori aninahuanin: “Quëmaso' Israiro itarinën,” itërin. <sup>32</sup>Ina na'piro'sa quëran Sinioro artaronën niantarin. Ina tahuirinquënta', panca casharin. Cato shonca quiro trico ya'coninso', casharin. <sup>33</sup>Inapora huaton artaro aipi ihuë acorin. Ina quëran toroa'hua tëparahuaton yaquirin. Inapotërinso pita ihuë aipi acorin.

<sup>34</sup>Inaquë acorahuaton israiro'sa camairin:

—Catapini orina'hua i'sha quëcátoma', toroa'hua yaquirahuëso opotoco', itërin. Napotohuachina ina inachachin

nipi. Naquëranchin inapotaantacaiso camaitaantahuachina, inapotaantapi. Cararo inapotopi. <sup>35</sup>Inapotopi ni'ton, i'shaso' artaro noyá së'cotërin. Casharinsonta', noyá mëntaitërin.

<sup>36</sup>Ahuikitacaso ora nanihuachina, artaro ya'carirahuaton chiniquën Yosë nontërin: “¡Sinioro, quëmaso' Apraan, Isaco, Cacopo, inapita chinotërinën! Ipora nontëranquënso' a'panitonco, quëmasáchin Yosënuquën ninanso' anitotocoi. Canta piyapinëncó ni'to, camaitëranso chachin nisarahuë. Inanta nitochina! <sup>37</sup>A'panico Sinioro. Quëmasáchin Yosënuquën nicaton, piyapinënpita noya chinotaanta'inënuquëso nohuantëran. ¡Ina nitotacaiso marë' a'panico!” itërin. <sup>38</sup>Naporo chachin inápa quëran Siniorori pën a'paimarin. Oshanëna marë' artaro aipi acopiso'



ya'ipi ahuiquitèrin. Ihuë, na'piro'sa', amocan, i'sha mëntairinso', inapitanta huiquitèrin. <sup>39</sup>Ina nicatona ya'ipi ni'tèrantapisopita isonpi. No'paquë huarë' monshorahuatona': "¡Siniorocha Yosëso paya!" topi. <sup>40</sup>Naporo' Iniasëso camaitaton:

—¡Paaro marë' pënëntopisopita ya'ipi maco'! itèrin. Napotohuachina israiro'sari ya'ipi mapi. Nani mapachinara: "Quison i'shaquë quëparahuatëhua', inaquë tëpa'ahua'," ténin. Napohuachina inaquë quëparahuatona tëpapi.

**O'nanacaso marë'  
Iniasë orarinso'**

<sup>41</sup>Ina quëran Iniasëri Acapo itapon: —Paaton coshatëquë', o'oquë', co'huara o'nan huë'shatërasohuë', inapoquë'. Nani o'nan ya'caritarin, itèrin. <sup>42</sup>Napotohuachina pa'sahuaton, coshatèrin, o'orin, naporin.

Iniasëso napoaponahuë', Carmiro motopi hui'nimotën'pa' pantarin. Inaquë isonahuaton, to'topitënëncuë huarë' ya'pirin paquëmarin. <sup>43</sup>Ina quëran piyapinën itapon:

—Paaton marë' parti notëtëquë', itèrin. Napotohuachina, inaso pa'sahuaton notëontarin. Huënantarahuatón:

—Capa, co manta ya'norinhuë', itèrin. Napotopirinhuë', Iniasëri naquëranchin camaiantarin:

—Canchiséro pa'sahuaton notëontaquë', itèrin. <sup>44</sup>Canchiséro pa'ninquë, piyapinënso' sha'huiintarin:

—¡Marë quëran imira napapi chitoro pipiarin quënanahuë'! itintarin. Naporo' hua'anëni camaiantarin:

—Paaton Acapo sha'huitonquë toronanën cahuarionënpitaquë a'ténchin. Inaporahuaton a'naroáchin pa'in. Co'huara chiníquën o'nani ya'shopiara, itèrin.

<sup>45</sup>Napotohuachina Acaposo', toronanëncuë huënsërahuaton, Quisiro ninanoquë pa'nin. Paaso', o'nan tashiroterin. Ihuane chachin huëcaton chiníquën o'nanarin huachi. <sup>46</sup>Iniasëso', Siniorori achinirin. A'morinso amotoontarahuatón, sintoronquë noyá huëquëantèrin. Inaporahuaton ta'ahuachina, Acapo na'huëtèrin. Ina'ton Quisiro ninanoquë canconin.

**Oripi motopi'pa'  
Iniasë ta'arinso'**

**19** <sup>1</sup>Acaposo ya'huërin'pa' canconahuaton, ya'ipi Iniasë naporinso Quisapira sha'huitèrin. Paaro marë' pënëntopisopitanta atëpatèrinso', sha'huitèrin. <sup>2</sup>Ina natanahuaton Quisapiraso', Iniasë sha'huitacaso marë' a'nara comision a'parin: "Naporin Quisapira: 'Quëmaso' Paaro marë' pënëntona'piro'sa acorahuëso', atëpatèran. Napoaton carionta atëpata'huanquënso ya'huërin. Tashiraya ipora pochin atëpatèransopita pochin nitaranquën. Co'so' inapotohuatënquënhuë', mamanshiro'sa chiníquën ana'inchinaco,' ténin," itèrin.

<sup>3</sup>Ina natanaton, Iniasëso pa'yanin: "Co'so' ta'ahuatohuë', tëpaponaco," ta'ton Piirsipa ninanoquë piyapinën chachin ta'arin. Inaso ninano', Cota huënton no'panën pa'marin'pa' ya'huërin. Inaquë canconahuaton, piyapinën patèrin. <sup>4</sup>Ina quëran inaso', inotëro parti paaton, a'na tahuërira' iratèrin. Napoin quëran nitama nara tashinantèrinquë huënsëconin. Inaquë co napon cancantárin. Yachiminatón: "¡Co huachi Sinioro ahuantërahuë'! ¡Canta', shimashonëhuëpita pochachin naponahuë ni'ton, acopitochanco!" itèrin. <sup>5</sup>Napotahuaton ina narasoquë quëhuënin. Quëhuënin quëran huë'erin.

Napoaponahuë!, Siniro anquëninëni pichianahuaton ochinanin. Capayatohuachina itapon: “Huënsërahuaton coshatëquë!,” itërin. <sup>6</sup>Huënsërahuaton yonissarin. Ni'pirinhuë!, motoantërinso pirayan pan pënayaquë anpipiso!, quënanin. I'shanta yonshaquë ina pirayan huënsëarin. Ina quëran huani-  
rahuaton coshatërin, o'orin, naporin. Nani coshatohuachina quëhuëantaton huë'antarin. <sup>7</sup>Napoaponahuë!, Siniro anquëninëni pichiantarahuaton ochinaantarin. Capayatohuachina itapon: “Huënsëantarahuaton coshataantaquë!.  
Áquë iratamaso ya'huëtërinquë. Co'so' noya coshatohuatanhuë!, co chinoranquë cancontaranhuë!,” itërin. <sup>8</sup>Napotohuachina, caantarin, o'oantarin, naporin. Inaporahuaton, catapini shonca tahuëri tashirë chachin iratërin. Pa'sápaton Oripa motopi'pa' huarë! canconin. Ina motopiso!, Siniro motopinën itopi anta!

<sup>9</sup>Cancontarahuaton, motopi naninquë huë'écaso marë! ya'conin. Ya'conpirinhuë!, Siniro itapon: “¿Ma'ta isëquë nissaran Iniasë?” itërin. <sup>10</sup>“Quëmaso Siniro Yosënuquë, ya'ipi nanitapan. Napoaton pa'pi a'pitëranquë. Israiro'sarë'quë anoyatëranso a'popi. Artaronënpitanta!, ohuatopi. Quëma marë! pënëntopisopitanta!, sahuëniquë tëpapi. Casáchin nipirinhuë!, tëpainacoso marë! yonissarinaco,” itërin Iniasëri.

<sup>11</sup>Naporo' Siniro itapon: “Aipiran pipirahuaton huaniquë!. Inaëchin na'huëarahuë ni'ton, inaquë huaniquë!,” itërin. Napotohuachina, inaso pipirin. Naporo' Siniroso' na'huëarin. Naporo chachin pa'pi chiniquë ihuan paaton motopiro'sa pa'ton pa'tontërin. Natëtëro'santa opoa opoatërin. Siniroso napoaponahuë!, co ihuanquë ya'huërinhuë!. Ihuan na'huëso chachin, ocohua ya'huëre! paantarin. Siniroso

napoaponahuë!, co ocohuaquë tëranta ya'huërinhuë!. <sup>12</sup>Ocoanta copita'so chachin, pën ya'huëre! paantarin. Siniroso napoaponahuë!, co inaquë tëranta ya'huërinhuë!. Naporo' Iniasëso!, ya'coontarin. Pën na'huërin piquëran, yashin yashin natanchináchin, sanóshin huinpiro irinin. <sup>13</sup>Ina natanaton, aipi a'morinso quëran nipa'copirayatërin. Inaporahuaton pipiintarin. Naporo' Siniro nontaton itapon: “¿Ma'ta isëquë nissaran Iniasë?” itërin. <sup>14</sup>Napotohuachina: “Quëmaso' Siniro Yosënuquë, ya'ipi nanitapan. Napoaton pa'pi a'pitëranquë. Israiro'sarë'quë anoyatëranso a'popi. Artaronënpitanta!, ohuatopi. Quëma marë! pënëntopisopitanta!, sahuëniquë tëpapi. Casáchin quëparitopirahuë, tëpainacoso marë! yonissarinaco,” itërin.

<sup>15</sup>Naporo' Siniro itapon: “Ya'huëranquë paantarahuaton Tamasco ninoquë huarë! paquë!. Inaso ninano!, inotëro intonquë ya'huërin. Inaquë a'nara quëmapi Asairo itopiso!, Siria copirno nicacaso marë! acoonquë!. <sup>16</sup>Ya'huëre! israiro'sa copirnonën nicacaso marënta!, Nimisi shiin Quio itopiso!, acoquë!. Quëma ya'huërenamën pënëntona'pi nicacaso marënta!, Sahuati hui'nin Irisio itopiso!, acoquë!. Inaso!, Apiri-miora ninanoa'huaquë ya'huërin. <sup>17-18</sup>Inapotohuatan, insosona Asairo quëran cha'ëpachin, Quiro tëpapon. Quio quëran cha'ëpachin, Irisio tëpapon. Ina nipirinhuë!, ca nohanton canchisë huaranca israiro'sa imamiatarinaco. Inapitaso mamanshi Paaro itopiso!, co moshapihuë!,” itërin.

#### **Pënëntacaso marë! Irisio acorinso!**

<sup>19</sup>Siniro napotohuachina, Iniasëso ya'huërinquë paantarin. Apiri-miora

ya'cari nipachina, Irisio sacatarin quënanconin. Shonca a'na quëmapi'-santa quëchitapi. Inapitaso' cato cato tororo'saquë no'pa' ohuërërantapi. Piquëran nininso Irisiori quëpararin. Iniasëri paaparahuaton, aipi a'morinsoquë imopitërin. Inapotahuaton huëshiarin. <sup>20</sup>Naporo chachin Irisioso', tororo'sa a'porin. Ina quëran ta'arahuaton icantoonin:

—Imasaranquën mini siniro. Napoaponahuë', quëtoco paato, tata, mama, inapita nonta nonta'i, itërin.

—Noya paquë'. Ama napoaponahuë', napotëranquënso' naniantëquësohuë', itërin Iniasëri.

<sup>21</sup>Napotohuachina, pa'sahuaton cato chachin toro asacatërinso', tëpaconin. Ina anpicaso marënta', nararo'sa oyoninso' manin. Inaquë nosha anpihuachina, ca'pi. Nani ca'pachinara, pa'pin, a'shin, inapita, nontërin. Inapotahuaton, Iniasë imarin. Imaton, ina marë' sacatërin.

### Napoto oparonën Acapori osëretërinso'

**21** <sup>1</sup>Hua'qui quëran pochin Acaposo', nanan ocoiantarin. Quisiriroquë chachin a'nanta quëmapi ya'huërin. Napoto itopiso'. Inaso', Acapo copirno hua'anëntërinso pëinën pirayan oparonën ya'huëtërin. <sup>2</sup>A'na tahuëri Acaposo', Napoto itapon:

—Oparonën pa'antoco topirahuë. Ina marë' no'tëquën pahuërë'inquën. Co'so' pa'antancoso' nohuantohuathanhuë', carinquën nipachin a'na oparo noya noya nininso' quëchinquën. Pëinëhuë pirayan ya'huërin ni'ton, nisha nisha cosharo shaca'huaso marë' nohuantërahuë, itërin. <sup>3</sup>Napotopirinhüë', inariso itapon:

—Isoso oparo', tatahuë yachimination, cari hua'anënta'huaso marë'

quëtërinco. Shimashonëhuëpitarinta ina chachin hua'anëntopi ni'ton, co quëta'huanquënso' Yosë nohuantërinhuë', itërin.

<sup>4</sup>Napotërinso natanaton, inaso sëtërin, no'huitërin, naporin. Pëinëquë quëhuënconahuaton, paira parti notë-tërin quëran natantárin. Coshatacaso marë' përapirinhüë', co nohuantërinhuë'. <sup>5</sup>Napohuachina Quisapirari paaparahuaton itapon:

—¿Onpoatonta pa'pi sëtatón, co yacoshatëranhuë'? itërin.

<sup>6</sup>—Napoto oparonën nohuantato, iso pochin nontërahuë: “Ina marë pahuërë'inquën. Co ina nohuantohuathanhuë', a'na oparo ina ya'huërenamën noya noya nininso quëchinquën,” itërahuë. Napotopirahuë, co nohuantërinhuë', itërin so'ini.

<sup>7</sup>—¿Macairata hua'anquënso'? Ama ina marë' sëtatónhuë', coshatëquë'. ¿Carinquën quëtëranquën Napoto oparonën! itërin sa'ini.

<sup>8</sup>Napotahuaton Acapo nininën a'pitaahuaton quiricaros'a ninshitërin. Copirno sichonëquë chachin sichotahuaton, Quisiro ansiano'sa a'patërin. <sup>9-10</sup>Quiricaros'aquëso' tapon: “Niyontonatoma ayono nicacamaso marë' sha'huico'. Niyontónpatama', ya'natiirinsó huënsënanquë Napoto ahuënsëco'. Ina notënanquënta', cato ya'pi ina nonpinapicaiso marë' ahuënsëco'. Ina quëran ya'ipi natantapaiquë nonpinapiina: ‘Napoto Yosë no'huiton, pinorin. Copirnonta', napotërin natanai,' ichina'. Ina piquëran inaso', ninano quëran ocoico'. Inaquë na'piquë të'yaratoma tëpaco,’” tënin.

<sup>11-14</sup>Napohuachina ya'huëhuano'sa', ansiano'sa', hua'ano'sa', inapitaso ina inachachin nipi. Inapoatona', a'nara comision Quisapira sha'huitacaso marë'

a'papi. Cantonahuaton: “Napoto nani na'piquè tè'yaratona tèpapi,” itèrin.

<sup>15</sup>Ina natanaton, Quisapiraso' so'in sha'huitèrin: “Oparonèn co yapa'antèrinquènsohuè!, nani chiminin. Paaton ina oparo quèinari maquè!,” itèrin. <sup>16</sup>Ina natanaton, Acaposo Napoto oparonèn hua'anèntèrin huachi.

<sup>17</sup>Naporo' Siniorori Iniasè nontaton itapon: <sup>18</sup>“A'naróachin pa'sahuaton, Acapo ni'contaquè!. Apiramiachin inaso!, Napotoco oparonènquè nisarin. Ayananpirin ni'ton, hua'anèntacaso marè' pa'nin. <sup>19</sup>Quènanconpatan napotèquè!: ‘Naporin Sinioro: Napoto tèparahuaton oparonèn matèran. Inapotèran ni'ton, ni'niraro'sari huèinainèn irotèrin. Ina marè' quèimanta inaquè chachin ni'niraro'sa huèinainèn irotapènèn,’ itèquè!,” itèrin.

<sup>20</sup>Napotohuachina, pa'sahuaton Siniorori napotèrinso' Acapo sha'huitonin. Napotohuachina Acapori itapon:

—¡Quèmaso' inimiconèhuènquèn nipiranhuè!, niquènanèchi paya! itèrin. Napotohuachina Inari itapon:

—Co Sinioro costarinsohuèráchin ninanso marè' niquènanè!. <sup>21</sup>Napooton Sinioro napotèrinquèn: “Ya'ipi quèimá quèran pipipisopita Israiro nacion quèran ata'huantarahuè. A'naquèn inaora marè' sacatapona!. A'naquènso' patrohuanapona!. Inapopirinahuè ya'ipi inapita tiquiarahuè. <sup>22</sup>Quiropoamo, Paasa, inapita copirnoros' sa quèimopinènpita napotèrahuèso pochachin quèimanta nitaranquèn. Inapita pochachin quèimanta israiro'sa aoshahuanan. Inaporan ni'ton, pa'pi no'huitato napotaranquèn.

<sup>23</sup>Quisapiranta yonquiaton, Siniorori itèrin: ‘Quisapiranta chiminpachin, Quisiro ninano pairanèn pirayan, ni'niraro'sari noshanèn capona!.

<sup>24</sup>Insosona quèima quèimopinèn nina-noquè chiminpachin, ni'niraro'sari ca'sarin. Áquèsos' chiminpachin, chanaro ca'tèros'ari capona!, ténin,” itèrin. <sup>25</sup>(Co a'na tèranta Acapo copirno pochin ya'huèrinhuè!. Inaso!, ya'ipiya quèran nápo naponin ninin. Sa'ini camairin ni'ton, co Sinioro nohuantèrinsohuè!, nisárin. <sup>26</sup>Nisha nisha mamanshiro'sa mosharápato, amororo'sa pochin niconin. Inapitaso' Siniorori ocoirin. Israiro'sari ya'huèrètacaiso marè' napotèrin.)

<sup>27</sup>Iniasèri napotèrinso' natanahuaton, Acaposo pa'pi sètèrin. A'morinso osharahuaton, sa'catèn nininso' a'morin. Naporahuaton co huachi coshatatonhuè!, Yosè yonquirin. Huè'èpachinanta!, inanpi a'morinquèranchin huè'èrin. Oshanèn marè' sètèrinso' nitotacaiso marè' naporin. <sup>28-29</sup>Napohuachina, Siniorori Iniasè itapon: “¡Ni'què! Acaponta co noyahuè! nininso marè' sètèrin. Napooton inaporinso marè' co nanpiso' ana'intapohuè!. Nani chiminpachin, hui'nini ya'huèrètapon. Naporo' quèimopinènpita ana'intarahuè,” itèrin.

#### Acapo minsècaiso', Miciasèri sha'huitèrinso'

**22** <sup>1</sup>Cara pi'ipi pochin israiro'saso!, siriario'sarè' co huachi niahuèpihuè!. <sup>2</sup>Naporo' Cota huènton copirno Cosahuato itopisoso!, Acapo nicapon pa'nin. <sup>3</sup>Ninontèrapi quèran Acaposo!, sontaro hua'ano'sanènpita napotèrin:

—Carata parti Namoto ninano ya'huèrin. Inaso ninano!, canpoanquèn. Napoaponahuè!, Siria copirnoros' hua'anèntarin. ¡Pa'ahua osèrètahua! itèrin. <sup>4</sup>Napotahuaton, Cosahuatonta natanin:

—Siria sontaro'sa Namotoquè ya'huèapi. ¿Co'tama quèimanta inapita

ahuëa'huaiso catahuaponcoihuë' to? itërin.

—Quëma topatan, catahuainquën nipa-chin. Sontaronëhuëpita ira pa'topiso', cahuarioquë pa'piso', inapitanta quëma sontaronënpita catahuararin. <sup>5</sup>Napoa-ponahuë', co'huara pa'shátërasëhuahuë', Siniro natahuan. Ina nohuantërinso' anitochinpoa', itërin inarinta'.

<sup>6-7</sup>Napotohuachina Acaposo', pënëntona'piro'sa ayontonin. Catapini pasa ayontonahuaton natanin:

—¿Sontaro'saroco chachin pa'sahuato, Namotoquë Siria sontaro'sa ya'huëpiso', ahuëco'in? itërin. Napotohuachina inahuari:

—Noya paquë'. Siniro catahuararinquën ni'ton, inapita minsëaran, itopi. Napopirinahuë', Cosahuatoso Acapo natanin:

—¿Co'tama aquëtë Siniro marë' pënëntërinso ya'huërinhuë nica? inanta natanëhua naporini, no'tëquën anitochitonpoahuë', taantarin.

<sup>8</sup>—Ya'huërin mini a'nara. Inaso', Imiro hui'nin Micaiasë itopiso'. Cariso napoaporahuë', co quë'yarahuë'. Ma'sha onpoca'huasoráchin sha'huitërinco ni'ton, naporahuë, tënin Acapo. Napopirinahuë':

—Ama napoquësokuë', itërin Cosa-huatori. <sup>9</sup>Naporo' Acaposo', a'nara hua'an camairin:

—A'naróchin Micaiasë quëquë', itërin.

<sup>10</sup>Cosahuato, Acapo, inapitaso shira-nënaquë huënsërantapi. Ahuëtai marë' nitapapiquëranchin Samaria ninano prasa'huayanënuquë huënsëapi. Inaso' prasaa'huaya ya'coana pirayan ya'huërin. Inaquë a'napita pënëntona'piro'saso', pënëntápi.

<sup>11</sup>A'naso pënëntona'pi, Quinaana hui'nin Sitiquiasë itopi. Inaso' pënëntacaso marë' hua'na quëran pomono'sa ninin. Ina a'norahuaton, chiníquën pënëntarin: “¡Naporin Siniro: ‘Iso pomono'sa<sup>b</sup> quëran ohuanëso pochin nitaton, Siria sontaro'sa minsëaran! Tiquiaquë huarë' inapitaran, tënin,” tosárin. <sup>12</sup>A'napita pënëntona'piro'santa', inachachin copirno sha'huitápi: “Siria sontaro'sa Namotoquë ya'huëpiso', ahuëconquë'. Napohuatan canataran. Siniro catahuarinquën ni'ton, inapita minsërahuaton ninano osëretaran,” itápi.

<sup>13</sup>Micaiasë macapon pa'ninso' hua'ani, quënanconahuaton itapon: “Naní quëran a'napita pënëntona'piro'saso', copirno nohuantërinso chachin sha'huitapi. Napoaton quëmanta', inapita pochachin sha'huiquë topirahuë',” itërin.

<sup>14</sup>—Siniro camairincosoráchin Yoscoarë' caso sha'huirahuë, itërin Micaiasëri.

<sup>15</sup>Acapotaquë canconpachina, inari itapon:

—Micaiasë. ¿Noya ipora Namotoquë paato Siria sontaro'sa ahuëca'huaso' to? itërin.

—Paaton ahuëconquë'. Canpita canatarama'. Siniro catahuarinquëma ni'ton, inimicoro'sa minsërahuatoma', ninano osëretarama', itërin Micaiasëri.

<sup>16</sup>—“Siniro ni'sárinco no'tëquën sha'huitaranquën,” ta'ton no'tëquën sha'huitoco. Nani na'aro sha'huitëranquën ina pochin nontancoso', itaantarin Acapori. <sup>17</sup>Naporo' Micaiasë tapon:

“Pa'patan ma'sona onpocamaso' nani ninorahuë.

Ohuicaro'sa co hua'anëhuanhuë pochin Israiro sontaro'sa motopiro'sa yanquëtopi.

<sup>b</sup> 22.11 *Pomono'*: Iráca israiro'sa ya'huëpiso parti, chiníquën nipiso' ayonquirin. Toro pomonën quëran co oshatarinpoasokuë pochin nininso' ayonquirin.

Napopi ni'ton, Siniro sha'hui-  
tërinco:

‘Inapitaso' co hua'anëna ya'huë-  
topihuë'.

Napoaton noya quëran ya'huë-  
pi'pa' paanta'ina,' tënin,”  
itërin.

<sup>18</sup>Naporo' Acaposo', Cosahuato itapon:

—¡Ni'nina huachi! ¡Napotëranquënso  
chachin ma'sha onpoca'huaso' sha'-  
huitarinco! itërin.

<sup>19</sup>Ina quëran Micaiasëso', taantapon:

—Naporanso marë' Siniro a'notë-  
rincoso sha'huichinquën natanquë':  
Siniro hua'anëntacaso shiranënquë  
huënsëarin ni'nahuë. Sontaronënpita-  
tanta'<sup>c</sup>, ina ya'cari huaniápopi. Inchinan  
quëran, ahuënan quëran huaniápopi.  
<sup>20-21</sup>Naporo' Siniro inapita natanin:  
Namoto ninanoquë Siria sontaro'sa  
ya'huëapi. Inaquë pa'sahuaton, chimina  
marë': ¿Incarita Acapo nonpintapon  
ipora? itërin. Napohuachina na'a  
anquëniro'sari nisha nisha sha'huitopi.  
Napoaponahuë', a'na sopairi Siniro  
ya'carirahuaton: “Cari nonpintarahuë,”  
itërin. “¿Onpo nonpintaponta'?” itërin  
Siniororinta'. <sup>22</sup>“Ya'ipi pënëntona'pi-  
ro'sa Acapo camairinso nonpintarahuë.  
Inapitari sha'huitohuachina, ahuëtapon  
pa'sarin,” itërin sopairi. Ina nata-  
naton, Siniorori itapon: “Naporinchi  
paya. Nonpintaran ni'sora. Pa'maton  
inapotëquë',” itërin. <sup>23</sup>Naporin ni'ton,  
nonpintarinënso' nani nitotëran. Siniro  
tëpainquënso' yonquirin. Napoaton  
sopairi pënëntona'piro'sa camairanso',  
anonsarin, itërin.

<sup>24</sup>Naporo' Sitiqiasëri, Miquiasë  
panpirayarin. Napotahuaton:

—“Siniro ispiritonëni Sitiqiasë anito-  
tacaso tananpitërin. ¡Ina tananpitaton,

ca ya'huëre anitotërinco huachi,”  
topatan, ninonpintaran! itërin.

<sup>25</sup>—Co hua'quiya quëranhuë' a'na  
patoanaquë a'na patoanaquë na'picaso  
marë' ta'a ta'arantapon. Naporo' no'të-  
quën nonahuëso', nitotaran quëmanta',  
itërin Micaiasëri. <sup>26</sup>Naporo' Acaposo'  
sontaronënpita camairin:

—Micaiasë masahuatoma', Amon  
chirinchiataquë quëpaco'. Hui'nahuë  
Coasë itërahuësoarinta ni'in. <sup>27</sup>Inapi-  
taquë quëparahuatoma', sha'huitoco  
tashinanpëiquëchina'. Naporahuaton  
pi'pian pi'pian a'caina', o'shichina',  
napochina'. Siria sontaro'sa minsëato  
huënanta'huarë', inapochina', itërin.

<sup>28</sup>Micaiasëso napoaponahuë', taantarin:

“Noya huënantahuatanso',  
co tëhuëchachin Siniro  
noninso' sha'huirahuë',”  
tënin.

<sup>29</sup>Ina pochin Acapo, Cosahuato,  
inapitaso Namotoquë Siria sontaro'sa  
ahuëapona pa'pi. Ya'ipi sontaronënpita-  
tarë chachin pa'pi. <sup>30</sup>Inaquë nipachina  
Acaposo', Cosahuato itapon:

—Quëmaso' a'moranquëranchin  
ahuëtapon paquë'. Caso nipirinhüë',  
nisha a'moto ahuëtarahuë', itërin.  
Napoaton inaso', nisha a'morin quëran  
ahuëtapon ya'conin.

<sup>31</sup>Siria copirnosos', cara shonca cato  
capitano'sa camairin. Inapitaso' ahuëta-  
caiso toronano'saquë sontaro'sa pa'piso'  
hua'anëna'. Inapita camaiaton itapon:  
“Israiro copirnoráchin cancantatoma  
ahuëco',” itërin. <sup>32</sup>Napotohuachina inapi-  
taso', Cosahuato quënanpi: “Iso mini  
Israiro copirno,” ta'tona tancapitopi.  
Inapotohuachinara, inaso “yai,” tënin.

<sup>33</sup>Naporo inapitariso', nohuitopi: “Co  
aso Israiro copirnohuë',” ta'tona a'popi.

<sup>c</sup> 22.19 Sontaronënpita topachina: Anquëninënpita tapon naporin.

<sup>34</sup>Napoaponahuë!, a'nara Siria sontaro pë'chinanën quëran inantërin. Topinan a'paponahuë!, Acapo ohuanin. Hua'na cotonën nipachintërintaëchin pichinan ninopinën ohuantërin. Napotohuachina inaso!, toronanën quëpana'pi camairin:

—¡Acorinacochi paya! ¡A'potahuaton chi'huincaco! itërin. <sup>35</sup>Naporo tahuëri pa'pi chiniquën siriaro'sarë' niahuëpi. Napoaso copirnosol, a'naquën sontaro'sari achinipi ni'ton, huanichináchin nii'huarin. Napoaponahuë!, i'hua-  
raya huarë' chiminin. Toronaanaquë huënainën noquitërin ni'ton, naporin.

<sup>36</sup>Pi'i yaya'conahuaso!, Israiro sontaro hua'ano'sa chiniquën nanan sha'huipi: “¡Ya'ipinquëma ya'huëramaquë paco!”  
<sup>37</sup>Copirnonënpoa chiminin ni'ton, co huachi ahuetacaso ya'huërinhuë!” topi. Ninapotatona yanquëëpi. A'naquën

hua'ano'saso nipirinhue!, copirno nonën Samariaquë quëpapi. Inaquë quëmo-pinënpitari pa'pitopi. <sup>38</sup>Ina piquëran a'naquën piyapinënpitari i'sha tapapiquë toronanën pa'motopi. Inaquë chachin monshihuantë sanapi'santa amapi. Siniorori Iniasë quëran iráca sha'huitërinso chachin, ni'niraro'sarinta huënainën irotopi.

<sup>39</sup>Iso quiricaquë, co ya'ipi Acapo naporinso ninshitërahuë!. A'na quëmapinta ninshitaton: “Acapo hua'anëntapontapon naporinso!” ta'ton ninshitërin. Hua'anëntacaso pëinën anitaton, huii pomon quëran acoana taparinso sha'huirin. Ninanoro'sa apairatërin-sonta!, sha'huirin. <sup>40</sup>Inapochin Acapo chiminin. Ina chiminpachina, hui'nin Ocosiasë itërinso ya'huërë!, israiro'sa hua'anëntërin.